



册府元龟  
卷之九十三  
至六



1 3  
849  
34



849  
34



冊府元龜

淮南李嗣京參閱

西極文翔鳳訂正

豫章黃國琦較釋

帝王部 九十三

赦宥第十二

後唐明宗長興元年二月乙卯郊祀畢還御五鳳樓  
宣制曰主者法天爲子長人爲君必在於上奉天明  
下從人欲奉天莫先於孝敬從欲莫先於矜寬則必  
上下叶和陰陽調序朕顧惟寡德猥紹丕圖祗荷景

靈敢不寅畏屬以域中作梗邊上多虞繼除梟鏡之  
妖累殄豺狼之族阻行大禮于茲五年負芒刺以靡  
寧積冰湯而爲懼今幸五兵偃戢百穀豐登謁清廟  
以寫心陟泰壇而瀝懇孝敬之道誠益勵於夙宵寬  
宥之懷固難忘於頃刻上承玄祐冀永無疆之休下  
念黔黎宜覃莫大之慶况天地交泰之始雷雨作解  
之初布澤益示於滂沱發號重新於渙汗滌瑕蕩穢  
通法申恩宜改天成五年爲長興元年可大赦天下  
應諸道見禁囚徒十惡五逆光火劫舍屠牛官典犯  
贓僞行印信合造毒藥外罪無輕重已發覺未發覺

已結正未結正咸赦除之其天成四年十二月終已  
前諸道州府人戶應有殘欠稅物蠶鹽食鹽乾摧濕  
摧旣係積年之欠俄逢作解之恩竝與免放諸州府  
營田戶部院應欠租課房店利潤逃移人戶死損牛  
畜或先遭剽劫及水旱處欠負斛斗無所徵填已收納  
到家產財物其餘所欠竝與蠲除所在倉場積年損  
壞使臣盤覆欠折尤多其主持專知官等據通收到  
產業物色外亦與放免應諸道商稅課利撲斷錢額  
去處除納外年多感欠枷禁徵收旣無抵當竝可放  
免諸道採造材木欠數定州材木錢及閩鄉船務遺

火所司累行催促無可填納亦與放免先南北兩軍  
前倉場持主損爛欠折及江河轉運拋失舟船並斛  
斛芟稈錢諸鎮欠少過軍准被糧草等據主持人見  
在家業勒收納外餘放所欠天成元年二月諸州般  
納到上供庫秤盤積欠物色并遭兵火燒劫及耀州  
前後身死刺史界分欠省庫錢物劫勒州司官吏陪  
填者竝特放免天成二年終諸色人於西川省庫內  
借過錢並省司先差人收買羊馬欠折死損無填還  
及天成二年終已前諸道銅銀鐵冶銀錫水錫坑窟  
應欠課利蕪木炭農具等場欠負亦與放免諸州府

或經水旱災沴恐人戶闕欠餽糧方植春時誠宜賑  
恤宜令逐處取去年納到新好屬省斛斛各加賑貸  
候秋收日徵納完數應天下府州合徵秋夏苗稅土  
地節氣各有早晚訪聞州縣官於省限前預先徵促  
致百姓主持送納博買供輸既不利其生民今特議  
其改革已令所司更展期限輔相之榮必資德望公  
侯之貴蓋選賢能欲展徽猷貴在彰顯內外羣臣職  
位帶平章事兼侍中中書令與改鄉名里號欲通和  
氣必在申寬將設公方實資獎善州縣官僚能雪冤  
獄活人生命者許非時選仍加階超資注官與轉服

色已着緋者與轉蕪官其朝臣及藩侯郡守等亡父母祖父母在并妻室未霑恩命者竝與追贈及叙封應有諸色私債納利已經一倍者只許徵本年外欠數竝放納利已經兩倍者本利竝放昭宗太祖莊宗時或有犯罪籍没人若有子孫在者竝許識認上祖墳塋主祭庄田已係官及有主承佃不在識認之限河陽管內入戶每畝上舊徵橋道錢五文今後竝放不徵諸道州府入戶每畝上元徵麩錢五文今特放二文只徵三文敢以赦文前事告者以其罪罪之赦書有不該者所司各具條例聞奏夫施令覃恩其期

及物苟有壅滯曷浣焦勞如聞近年赦書所在不廣宣布爲人臣者豈若是乎其在輔弼公卿藩侯郡守各轉忠力副朕憂勤共致治平永躋仁壽仍令御史臺嚴加訪察無縱稽留赦書日行五百里告諭天下咸使聞知

五月勅曰本朝列聖受冊徽號多施霑澤蕩滌瑕疵今緣纒過南郊不可便行大赦其中有恩未及者宜示優矜其諸色官員中或有經罰殿停替者宜竝許以停任時官資理選數赴調其諸徵科不了勒定州縣官等除已赴南郊行事該恩外慮有在外赴行事不

及者宜竝准上許理選序貴普沾於恩惠免未滯其身名俾得自新皆期受任

二年四月己巳勅旨應諸色官曾貶官者昨遇郊天量移近地想能知過宜漸服勤其量移官等各與特恩流竄者更與寬宥乙卯勅久憊時雨深疚予心雖遍虔祈猶未溥足宜廣推恩之道更敷恤物之懷貴獲感通必彰靈應宜令諸道州府各委長吏親問刑獄省察冤濫應見禁囚徒除犯死刑外餘晝時踈放除省司主持廻留敗闕軍將及諸色人等見別指揮三司商量或有情可矜憫或非欺罔積年致有逋懸

各具分析續行勅命并公私債負放至秋熟填納今年取者不在此限

四年八月戊申冊尊號禮畢制曰朕聞爲而不有曰天使而不知曰道下覆萬物中含兩儀難以嘗名加難以嘗德報是故賢君哲后則而象之雖有唐堯之聰明不伐其善雖有夏禹之勤苦不矜其功朕善愧唐堯功慚夏禹屬六十年亂離之後承億兆人塗炭之餘兒童悉習於戰爭耆艾罕聞於聲教強吞弱吐禮壞樂隳涼德恥躬豈易爲治所賴王公卿士戮力一心善無細而不行惡無大而不去革彼積弊成斯

小康夫化自心生平其心則化洽令從身出正其身  
則令行朕御茲九州迄今八載嘗懷戒懼罔敢怠荒  
每務推心感人謹身率下刑必有罪豈以喜怒而死  
生賞必有功豈以親讐而厚薄却雕鏤之麗日慮滯  
巧以蕩心罷畋獵之游娛恐逸豫之敗度未能全臻  
於富庶未能盡偃於干戈誠宜業業以兢兢詎可自  
尊而自大中外文武不謀同辭謂朕弘清淨之風戴  
以廣道樹生成之德而推之以法天堅讓固辭至于  
數四逼之不止去而復來雖義乃爾心深可嘉也而  
名過於實良所惕焉既大舉於徽章宜溥覃於霈澤

可大赦天下應八月四日昧爽已前在京天下州府  
見禁囚徒已結正未結正已發覺未發覺罪無輕重  
嘗赦所不原者咸赦除之長流人并諸色徙流人不  
計年月遠近已到配所並放還或有亡命山澤及爲  
事關連逃避人等並放歸鄉一切不問如過百日不  
歸首者復罪如初在京諸道將士各與等第優給應  
貶降官未復資者咸與復資州縣官內有先爲事勒  
停止者並許參選殿犯者免其所殿其間未會發覺  
長興三年正月一日已前諸道兩稅殘欠物色並宜  
減放或有先曾經災沴處逃戶却歸業者除見徵正

稅外不得諸雜科徭切委倍加安撫應係省司場稅  
倉庫今日已前諸色敗闕人等據其所有錢物家業  
盡底收納已上所欠並敗闕人並放其間未曾磨  
勘點檢者宜令省司便與磨勘點檢准前處分將來  
永不許任使如是雖稱敗闕省司未見申報文狀及  
見今勾當人已後敗闕於中錢穀或涉降赦文年分  
並不得援此爲例山林草澤之人雖頻命搜羅而尚  
慮沉滯委所在長吏切加採訪的有才氣義行者具  
以名聞必議量才任使在朝文武臣僚并諸色職員  
有直言極諫者如上封章盡當開納諸凡無主丘墓

自兵革已來經發掘者宜令觀察使刺史差人量事  
掩瘞敢有赦前事相告者以罪罪之於戲滌瑕蕩穢  
宇宙繇是澄清布德推恩遐邇以之胥悅所望藩垣  
羣后社稷諸臣既尊予以莫大之名當佐予以彌高之  
德日慎一日雖休勿休驅彼疲民置之壽域光爾在  
位顯我得人

愍帝應順元年正月戊寅受朝於明堂殿大赦改元  
末帝清泰元年四月乙亥卽位乙酉帝袞冕御明堂  
宣制曰王者司牧兆民寵綏四海爰屬統臨之始宜  
布渙汗之恩仰測天心俯從人欲所以春夏秋冬四



時先布於發生草木禽魚萬彙乃期於蘇息伏念大  
行皇帝承天眷祐立極艱難繫予眇躬嘗佐興運櫛  
風沐雨從湯征而多歷勤劬匣劍橐弓贊周道而克  
成底定爾後繼持玉節獲受桐珪事君必盡于忠誠  
爲子益堅於孝道諒穹蒼之可鑒異宗社之未寧旋  
屬杞國人憂荆山鼎孰痛攀髯之靡及念同軌之將  
臻爰自汧岐徑朝伊維所冀宿參蜃輅親奉山陵總  
覲宮闈旋承告令百辟堅陳於勸請三讓莫諧六師  
共切於推崇羣情益固昔夏啟以謳謠有屬能承大  
禹之基漢文以將相叶心克嗣高皇之業顧惟小子

豈迨前王自纘鴻圖如登虎尾惟當慎終若始居安  
慮危保七百載之延昌致億兆人之開太將布改元  
之令爰敷在宥之文宜改應順元年爲清太元年可  
大赦天下四月十六日昧爽已前內外見繫囚徒據  
罪已發覺未發覺已結正未結正罪無輕重嘗赦所  
不原者咸赦除之應左降官及徒流人與量移已量  
移者更與量移已放歸者量與叙錄應內外文武臣  
寮節鎮州府等使刺史文武職員將校並與加恩應  
自鳳翔扈駕員寮凡主兵主事者各賜功臣名見在  
京隨駕并諸道馬步將士並與等第優給並從別赦

處分自二月十四日西來文武參佐沒於王事者各  
與追贈仍叙錄子孫隨駕前資文武官寮竝量才任  
使鳳翔民李存劉實罄出家財以助軍賞竝與命官  
起事之初鳳翔三城民戶多遭燒燬竝宜本道撿視  
量給瓦木工價各令修葺自岐雍華陝已來王師所  
經踐履去道參里內夏稅竝與放免應三京諸州府  
長興三年十二月已前欠夏秋殘稅竝與除放其鳳  
翔卽自長興四月十二日終已前竝放  
二年五月乙巳御札曰王者父天子民深居高視恭  
已以行道褒賢以勸功盖以上承天休下除民瘼率

輦下以勸天下者一人而惠萬人爲子爲臣不可不  
察朕惟寡德獲纘丕噐奉先聖之神靈荷皇天之眷  
祐寅畏夕惕罔敢遑寧思與將相王公良牧賢宰共  
敷政教同致雍熙繇是詳酌政刑搜求利病以今觀  
古夜思朝行才濟於時雖蒿萊而必采言干於道雖  
誹謗而必容然而近歲已來多事之後邊陲尚擾府  
庫未殷扞防必假於兵師供饋須資於民力旣未能  
便停征伐固不可頓減賦稅念乃疲羸勞於鑿窳今  
歲爰自初夏稍屬愆陽朝昏正積於焦勞祈請果垂  
于甘澤所宜行慶以答殊休言念狴牢之人屬此鬱

蒸之候苦毒之狀所不能言况當長養之時特降哀  
矜之令應王京諸道州府見禁囚徒自五月十二日  
已前除五逆十惡光火劫舍持杖殺人官典犯賊僞  
行印信合造毒藥外委逐處長吏據已發覺未發覺  
已結正未結正不在追呼支蔓只正身招贓值劫速  
斷遣并見欠省司錢物外諸罪無輕重一切釋放應  
天下藩侯郡守令錄等爲我股肱作民父母必在精  
窮事理杜塞倖門副我憂勤察民疾苦刑獄不可以  
阿曲法令不可以滋章私不得害公利不得傷義長  
思砥礪共致隆平凡百庶官宜體朕意

晉高祖天福元年十一月己亥卽位於晉陽御崇元  
殿肆赦改元制曰古者君臨大寶子育黎民爰當御  
曆之初宣布惟新之令將冀昭蘇品物蕩滌瑕疵大  
推作解之恩俾樂咸亨之運恭以明宗皇帝經綸草  
昧統御寰瀛垂衣而八表歸心負展而十年無事必  
謂盤維永固鼎社無遷立萬代之基盍爲百王之軌  
範洎遺弓劍遂起干戈逆豎延災宗英失守劫奪神  
器侮亂天嘗誅戮至親霍害無告顧予何咎忽有異  
謀無名而大舉甲兵不道而廣勞生聚寰中板蕩天  
下驚搔內外離心遐邇積怨嗷嗷士庶若無所依契

丹皇帝不忘先朝特存舊好親提銳旅遠殄羣兇未  
整鶴鵝盡殲蛇豕而復念中原之無主憫四海之倒  
懸欲泰羣情特申大義猥惟涼德俾纂寶圖成命不  
迴固讓莫得殷湯以東征西怨乃踐帝圖夏禹以地  
平天成遂興王業矧予寡昧有愧推崇雖勉副羣心  
恭臨大位將何以祗膺眷祐統和人神以是馭朽興  
懷宵衣在念躋生民於富壽保社稷於延洪頒曆紀  
年既有遵於典冊推恩行慶將普及於幽遐宜改長  
興七年爲天福元年大赦天下十一月九日昧爽已  
前應在京及諸州郡邑罪犯及曾受僞命職掌官吏

并見禁囚徒已結正未結正已發覺未發覺罪無輕  
重嘗赦所不原者咸赦除之應曾相連賊黨軍人百  
姓有奔竄山谷者一切不問任歸本貫如却願在軍  
者亦仰所司申送當令本軍收管易俗移風宜遵善  
教尊本敬始自有嘗規應明宗朝所行勅命法制仰  
所在遵行不得改易悉力爲時罄財助國苟不推於  
恩信亦何示於賞酬自舉義已來應借率人戶及經  
抄括商旅資財錢物委所司明置文籍候平定之後  
當議給還京城將士降附軍戎自舉義以來悉聞忠  
蓋宜加賞賚以勸勤勞應在京諸軍將領兵士等候

竝破賊寨當議各加優賞有沒於王事者各與贈官其子孫竝與量才叙用文武官寮等又輸推戴之誠宜示獎勵之道應在京及文武官寮及軍府將較并勸進官等兼前資官內自五月後來未曾分掌職任竝各與遷轉官資自五月後來已曾受官者不在此限其軍府諸色職掌將吏等已及押衛職者各與遞遷職次塩麥之利軍府所須倘不便放戶人宜別從於條制所期濟衆無患妨公在京塩貨元是官場出糶自今後竝不禁斷一任人戶馭使雜易仍下太原府更不得開場糶貨其麴每斤與減價錢三十文恩

推掩骼義顯燭幽允諧遐邇之心冀叶陰陽之序應自舉義已來或有因事抵法之人及九月十四日後殺戮賊寇所在暴露骸骨未有骨肉收認無主者委逐處長吏埋瘞弓旌聘士巖穴徵賢式光振鷺之班將起維駒之應山林草澤賢良方正隱逸之事委逐處長吏切加採訪咸以名聞當議量才叙任昨以寇戎久在郊境頗傷禾稼賦租應近京畿五十里內委逐處令長檢覆當與免今秋稅租差科於戲甘澤配天萬物以之膏潤震雷出地百卉繇是發生將欲道和氣於八方示深仁於三面永康聖曆普洽民心凡

百庶寮洎方伯連帥克奉明恩勉揚厥職共臻至化稱朕意焉赦書日行五百里敢以赦前事言者以罪罪之布告中外咸使聞知

閏十一月辛巳入維壬午詔御史府促朝官入見勅曰朕遠提義旅尋尅皇都六部相次以奉迎兆庶晝時而安堵旋茲底定已遂廓清應文武百官等早列通班各懷忠節掩跡雖淪於汚俗推誠必候於維新但當共罄嘉謨副予虛佇虞秦可鑒在於用捨之間堯舜爲心方務含弘之德勉堅臣節深體朕懷其兩班臣寮應事僞庭者竝宜釋罪是日百辟謝恩於行

宮之外甲申御文明殿受朝賀用唐禮樂制曰蓋聞神無嘗祀惟德是歆民無嘗懷非賢不乂曆數有歸者人祇共贊文明懷遠者龜筮叶從所以周開七百之基夏作三王之首伏自莊宗失馭天下分離萬國懷賢三靈改卜明宗皇帝潛符景運克紹寶曆一蒞寰區八周星律僞主從珂始因微績序在維城遇大國之多艱以列藩而入統勦絕裔嗣屠害忠良臨大寶而罔以德聞御諸侯而惟將威脅朕以明宗皇帝每弘厚過益勵微誠無纖粟而使人可疑無絲毫而事君不謹豈期深苞禍孽暗抱猜嫌欲用奸謀擬相

魚肉初以北門之事委朕一生忽將汝上之田遷予十乘二三其德始終違心既欲害於無辜孰肯扶其不道而遇北朝皇帝英明鑒古威武冠今嫉彼不平閔予多難遂致累殲兇寇繼納降兵每借巨功俾成大業朕自興基構頗歷艱難奠兆億而保安敢興寐而輒怠今則重光日月再造乾坤宜覃在宥之恩以布鼎新之命可大赦天下今月二十九日昧爽已前應在京及諸州府凡有所禁囚徒已發覺未發覺已結正未結正罪無輕重嘗赦所不原者咸赦除之雷雨作解瑾瑜匿瑕宜加濫滌之恩用示包容之應中

外諸色職掌官吏有受僞命者一切不問既除巨蠹亦愍俱焚難全者須正呂刑可恕者特開湯網僞庭賊臣張延節劉延皓劉延郎等竝姦邪害物貪威弄權罪已滿盈理難容貸除此三人已行勅命外其有宰臣馬裔孫樞密使房暉宣徽使李專美河中節度韓昭裔等四人雖元事僞庭咸居重位每持忠懇不務詭隨僞主不任才謀遂致傾覆朕昔在藩邸備所諳知今竝釋放一切不問應中外官寮之外有自舉義已來歸順者委中書門下別加任使應僞庭貶降官未量移者與量移已量移者與復爵受官亦與復

資應徒流收管人竝放還伏以少帝地居嫡裔位纂  
洪圖王從珂始構異謀非理屠害一家骨肉將正承  
祧之典式敦敬始之名宜令中書門下追尊定謚擇  
日禮葬妃孔氏宜行追冊祔葬應有宿舊臣寮竝與  
量加敘用昨者舉義之地稱師之邦必蹂踐於川原  
要矜蠲於輿賦其河東管內諸縣稅租今年秋及來  
年夏稅各與減放一半警蹕經過之地望幸雖榮蕃  
漢雜處之兵禁暴難備旣頒渥澤須示優矜昨大將  
軍兵士自河東以至京畿沿路擾踐之處宜委逐處  
長吏公當檢覆據項畝特與蠲放今年秋稅一半朕

昨於霸府創置新軍救時昔在於後權郵下今徇於  
所欲河東所有新招置義勝軍人竝放逐便賞罰二  
柄激勸萬方倘稽甄獎之恩何答勤劬之效應扈駕  
及相次歸順軍都竝與重加優賞但緣宮內庫藏虛  
乏宜令三司疾速抽徵諸道稅物以充賞給其指揮  
使等竝與超轉官資五月後來已曾受恩命者亦與  
依資轉官高懸朗日昭臨必備於遐陬大扇仁風亭  
育罔遺於纖芥應天下歸順節度使刺史下賓席郡  
職及將校等委中書門下各與改轉官資覆車難襲  
弊政宜遷恤鄉邑之瘡痍救民人之疾苦其北京管



內鹽當戶合納逐年鹽利昨者僞命指揮使每斗須  
令人戶折納白米一斗五升極知百姓艱苦自後宜  
令人戶以元納食鹽石斗數自每斗依時價計定錢  
數所取人戶便隱折納一人湯沐之奉實在王畿兆  
民凋弊之風宜行仁恕其維京管內逐年所配人戶  
實鹽起從來年每斤特量減價錢十文應道州府所  
徵百姓正稅斛錢帛等除係省司文帳外所在州  
府竝不得裏私增添組配稅物應~~不~~懷才抱器隱遁  
山林方切務於旁求宜通行於搜訪委所在長吏備  
達朝吉具以名聞致仕官或勛力未衰才能可任將

表乞言之敬難從歸老之心委中書門下商量奏聞  
當議昇擢義夫節婦孝子順孫委逐道奏聞當加旌  
表應自起義已來或盡節捐軀歿於王事宜加褒贈  
燕恤妻孥俾義激於忠貞庶恩霑於幽顯鳴諫鼓以  
俟讜言列柱石以申寬滯將聞善以自戒思與物以  
垂恩備著前規用光大業或直辭可貢或有理可矜  
各務奏陳皆當鑒納明宗朝屬之內宿舊之中或功  
名曾著於輿情或材氣可裨於公政宜委中書門下  
量才叙錄關防凡有征稅省司曾降條流慮多時而  
或有隱藏因肆赦而再頒條貫應諸道商稅仰逐處

將省司各收稅條件文牒於本院前分明張懸不得收卷榜內該名目分數者卽得收稅如榜內元不該說著係稅物色卽不得收稅宜令所在長吏嘗加覺察如敢有違條流不將文榜張懸將不合係稅物色收稅欺罔官法停滯商賈盡時具名申送奇伎淫巧往詣不容務實去華哲王所尚應有浮虛假僞之物不鬻於市肆委所在嘗加覺察犯者加重刑責士流之內有懷才抱器碩學殊能者委中書門下搜訪任使勿拘門地資歷於戲愛民如子王者之所以勃興損已從人耿躬而安敢自忽况朕驟主百靈之祀創

開萬乘之基朽索在懷求衣益勵更賴庭中多士闔外諸侯咸罄良籌共裨不逮物寧鯨浪適啟龍窟冬陽開溫昭之光春雨灑涵濡之澤惟新正令不宰玄功中外臣僚體予深意

二年四月甲申入汴州丁亥制曰歷代省方蓋觀風而設教前王展義皆利國以便民雖今古以有殊在皇上而無異朕艱難創業宵旰臨朝每軫念於瘡痍敢自辭於癰瘡近以浚郊粵壤梁苑名區乃舟車通會之都實人物殷繁之地春秋租稅可贍給於兵師遠近蒸民免煩勞於饋運爰從清雒遂整鳴鑾六飛

既議於按巡四海漸期於開泰今則已臨汴水宜順薰風思覃渙汗之恩特布如綸之命普安區宇首念徃牢况當長養之時曲示矜寬之澤應天福二年四月五日昧爽已前諸道州府見禁囚徒大辟已下罪無輕重竝從釋放凡關布澤務在及民宜加軫憫之恩俾遂蘇舒之望天福元年已前諸道州應係殘欠租稅竝特除放諸道係徵諸色人欠負省司錢宜令自僞主清泰元年終已前所欠者據所通納到物業外竝與除放或水旱爲災虫螟作沴儻無軫恤何致旱豐朕昨行至鄭州滎陽縣界路旁見有虫食及旱

損桑麥處委所司差八簡覆量與蠲免租稅河陽管内酒戶百姓應欠天福元年閏十一月二十五日已前不敷年額麴錢竝放其諸處應經兵火者亦與指禪當罪卽誅式明嘗典旣往可憫宜示深仁僞主清泰中臣僚內有從誅戮者竝許收葬要荒之內鄉黨之中宜弘養老之規式表問年之道天下百姓有年高八十已上者與免一子差徭仍令逐處簡置上佐官過滎陽而因思紀信屈夷門而尚想侯嬴著高義者猶足歎嘉蹈忠節者固宜旌賞事資激勸恩在褒揚梁故滑州節度王彥章勅命當時致身所事凜千

年之生氣流百代之令名宜令超贈太師子孫量才  
叙錄亡命藏姦此自攙搶之際好生惡殺宜弘曠蕩  
之恩應諸道州府管界內有自僞命抽點鄉兵之時  
多是結集劫盜因此畏懼刑章藏隱山谷宜令逐處  
曉諭招携各令復業自今年四月五日已前爲非一  
切不問如兩月後不來歸業者卽令所在長吏嚴加  
捕逐復罪如初於戲撫俗安民御宇式明於敏政行  
慶施惠爲君用顯於推誠况潛躍之時開創之始外  
則五侯九伯協力裨助內則四輔三公同心翼戴已  
寧華夏實賴忠良旣光帶礪之勳無忘盤盂之誡凡

百有位更竭乃誠共致隆平永輔寡昧布告遐邇宜  
體朕懷

八月乙巳制曰雷雨作解表天道之推恩瑾瑜匿瑕  
顯國君之舍垢顧惟師古敢怠弘仁關河旣靜於昏  
霾綸綍宜覃於慶澤昨者張從賓輒萌逆節遠結叛  
臣釁起三城悲躔兩地占據我都邑虔劉我士民丸  
泥欲閉於虎牢祆霧幾迷於鳳闕賴乾坤垂祐將相  
協謀渠魁送死於網羅兇黨咸膏於原野捷音繼振  
惡蔓皆除宜施曠蕩之恩以撫驚搔之地仍頒霈澤  
徧及縲囚貴感召於淳和速盪平於氛祲天福二年

八月二十五日昧爽已前天下見禁囚徒除十惡五逆光火劫舍持杖殺人合造毒藥官典犯贓欠負官錢外其餘不問輕重已發覺未發覺已結正未結正竝宜釋放應自張從賓作亂已來有曾被張從賓及張延播脅從染污及符彥饒下隨身軍將等兼安州王暉徒黨除已誅戮外竝從釋放一切不問尚恐無知之人暗有恐動物色委維京留守河陽節度使明加察訪犯者重斷或無辜被害或徇節忘生旣抱沉寃宜申贈典應自張從賓作亂已來諸色官寮內有沒於王事者竝與追贈有子孫量才叙錄或是諸軍

小節級長行已下沒於王事者具給本家三年糧賜有男成長者委侍司備典諸軍內酌量安排富父春喉須誅元惡文王葬骨式表至仁自張從賓作亂已來所在殺傷者竝委逐處差人收拾骸骨壅瘞張繼祚在喪紀之中承逆豎之意顯從叛亂難貸刑章乃瞻先臣實有遺德遽茲之祀深所軫懷其一房家業准法雖已籍沒所有先臣并祖及母墳茔祠堂竝可交付親的骨肉主張應有犯事人親的骨肉除已誅戮外竝放一切不問所有祖先墳塋亦仰准此交付負國者天地不容爲逆者人神共怒未惟眚饗實有

感通昨出師之時將帥虔禱頗聞陰祐成此戰功唐  
衛國公宜封靈顯王其餘鄭州并汜水管內神祠宜  
令長吏差官點檢如有隳損處便委量事修葺貴伸  
嚴飾以答陰功五嶽承天四瀆紀地自正當陽之位  
未伸望秩之儀宜令差官徧往告祭兼下逐州府量  
事修崇所有近廟山林仍宜禁斷採樵降黜之科既  
然不濫洗滌之道足使自新應自創業已來降黜者  
竝可放還兵興已來邊疆多事或因虜掠或偶滯留  
歲序遷移家鄉迢遞魚腸鴈足嘗懸骨肉之恩月夕  
霜天必起桑榆之思宜令收贖俾遂歸還自梁朝後

唐已來前後奉使及北京沿邊管界虜掠往向北人  
口宜令官給錢物差使齎持往彼一一收贖放歸本  
家興兵動衆蓋矜元凶伐罪吊民須安兆庶應內府  
管界內今年夏稅近指揮只徵五分今以方駐兵師  
無不勞役竝宜蠲放於戲顧惟薄德屬此多艱敢忘  
御朽之規思廣納污之道爰敷渙汗貴洽蒸黎更在  
中外輔臣文武列辟同扶寡昧以致隆平告報寰區  
宜體朕懷

三年九月己巳勅魏府城內馬步諸軍將校員寮節  
級軍將長行及叅佐官員僧道百姓等朕以范延光

是明宗舊臣與朕素敦分義因開懷而捨釋果歷懇以歸明君臣之義宛然金石之言無改亦繇諸軍將士叅佐職負同輸歸向之誠共感懷柔之道備觀忠孝深所歎嘉將徧示於渥恩宜先行於慰撫表予大信安爾衆心應在城官員將校嘗行今日已前罪無輕重一切不問范延光已除授鄆州節度使賜鐵券封本郡王孫漢威等將校等第除授防禦團練刺史已各別行制勅命使往彼宣賜恩命仍令各取便路赴任恩命未到間仍且委薛霸充都巡檢使喬謹充副巡檢使范延光赴任後即可取便路發赴所任具

餘將帥及叅佐官吏隨職員並一一分析名銜奏聞當議各加渥澤其應在城馬步軍將驍子指揮散員親從左右義勇先鋒并入馬直有馬步人神勇弩手鄭籛張進手下兵士并薛霸王建遣諸色將校衙隊名額軍都並陞爲侍衛親軍排連所有今年冬衣見闕綿數已指揮楊光遠收寨內綿勘會俵散應有先被張從賓脅從符彥饒驚擾及衛州黎陽陷失因茲走入及隔過官員使臣將士等兼自興師以來前後離背軍都住彼者並不問罪其官員使臣等並與錄任其將士等各與依舊請受諸軍收管如有入城後

遷轉職名者便據見守職名支給請受如有諸色人  
輒敢恐動竝當深罪在城將校及諸色官員應有物  
業爲人請射者竝許給還依舊爲主先有抽入城義  
軍竝放歸本家如是已配在諸軍者各隨本人所願  
如願在軍者卽依舊收管願歸農者卽放歸本家所  
有府城四面人戶三十里內與放二年秋夏租稅三  
十里外委逐縣令佐專切點檢如實曾經砍伐桑拓  
毀折屋舍者分折申奏盡與蠲放租稅切仰招携速  
令歸業應九月二十五日已前因事被殺之家不得  
更有論訟及相讐報妻孥家產已配沒者竝給還如

有自去年七月十九日後來曾經在城將校及諸色  
人請射合干等或爲配率柴薪或爲自要供燒毀折  
却者只據九月二十五日後見在者舍宇交割其有  
已破除却間未數日不得更有論索如內有屬官舍  
宇亦仰准此指揮應自去年七月十九日已前有諸  
色商旅或城內與城外親情相識應是寄留諸色錢  
物羊馬牛畜等或經括率或以沒納入官或破罄盡  
不計是何公私官員寄付竝不許更有論索如敢以  
敕前事相告言及相讐報者以其罪罪之朕方啟基  
扃務安華夏每推誠而待物日仗信以懷來布茲誓



言質諸天地天雄軍節度副使朝請大夫檢校刑部  
尚書賜紫金魚袋刑部李式可中大夫檢校尚書右  
僕射亳州團練使金紫光祿大夫檢校司徒貝州刺  
史孫漢威可檢校太保隴州防禦使天雄三城都巡  
檢使檢校戶部尚書薛霸可檢校司空衛州刺史天  
雄軍馬步都指揮使檢校工部尚書王建可檢校司  
空號州刺史天雄軍內外馬軍都指揮檢校戶部尚  
書樂元福可檢校司空深州刺史天雄軍內外步軍  
都指揮使檢校兵部尚書繡州刺史元霸可檢校司  
空隨州刺史李式本延光舊客歷數鎮從之薛霸延  
光妻弟自餘皆同惡相濟之腹心也

冊府元龜

淮南李嗣京參閱

西極文翔鳳訂正

豫章黃國琦較釋

帝王部 九十四

赦宥第十三

晉高祖天福三年十月戊戌勅曰天有四時首布和  
陽之命君臨萬國先弘曠蕩之恩所以垂青肆之文  
則周基遠大示寬仁之詔則漢業興隆朕猥以眇躬  
獲膺大寶顧惟涼薄每懼顛躋盱食宵衣恐一夫之

失所臨深履薄憂庶政之未孚雖粗致小康而未臻  
大化一昨災躔沙鹿兵駐銅臺擐甲執兵頗勞師旅  
飛芻輓粟重困生靈賴天地垂休將相叶力克寧邦  
家未靜烟塵凱歌共樂於班還喜氣實騰於遠邇豈  
一人之感召蓋羣后之扶持弓矢載橐大慶已流於  
中外雷雨解作普恩宜被於寰區庶使齊人咸霑霈  
澤可大赦天下應十月二十五日昧爽已前除犯十  
惡光火殺人僞行印信官典犯賊合造毒藥屠牛鑄  
錢外其餘罪無輕重已結正未結正已發覺未發覺  
咸赦除之侵官濶已爾其有諸督責暴徵我所不忍

應係省司課利場院官等宜依近行宣命期限磨勘  
徵督內有送納所欠錢物得足者其違限愆罪特放  
如有沒納本人及保人家業盡底外尚欠錢物更無  
抵當者其所欠並與蠲放其逐人罪犯特從減等其  
去年降宣命月日後來欠負者不在此限昨以水旱  
爲沴什一未均冀便蒸黎因令檢覆未明公法或彰  
隱漏之愆爰念小民宜示矜寬之典近令檢田有隱  
漏合當罪犯者並放所有合罰令陪納租稅者特放  
並令却依實項畝輸納貨泉所聚徵督必行况係省  
之逋懸宜應期之供辦但以兵戈之後帳籍空存已

行蠲放之恩尚憂未普再示優饒之命式表推恩天  
福元年應經兵火處州府諸色場院因此失陷錢物  
等先曾指揮蠲放一半者今並全放未曾經減放者  
今與蠲放一半天災或降地分所招携老幼以流離  
棄田園而蕪沒深懷惻憫宜示招安蒲同晉絳滑濮  
魏府鎮定等州人戶或經亢旱或屬兵戈逃移人戶  
等應移戶所欠今年已前諸雜稅物並特除放宜令  
州縣曉示招携如有復業者仍放一年秋夏和稅二  
年諸雜差徭爰自攻圍每多徭役或因兵死尚有戶  
存言念傷痍屢宜優恤應差赴魏府城下人夫內有

傷中身死者除已支孝贈外特放戶下三年諸雜差  
徭勤官奉國旣彰盡瘁之誠賞善酬勞爰舉必行之  
命應魏府側近州或曾祗應供饋或曾部領人夫當  
職員僚及州縣官等宜令逐處速具名術分析申奏  
當與加息區宇之表咸在炤臨疆場之間寧容隔限  
示王者之無外期國家之大同應淮南西川兩處邊  
界自今後不得阻滯商旅明堂欲構必自羣才大道  
曲全俱無棄物將期多士詎可遺賢累朝廢棄官員  
與量才叙用頃者借率猶有逋懸戶務優饒豈宜徵  
督先率借雜京舍錢其所欠並放七萃師徒五營吏

士偶因罪負遂至逋逃念曾效於忠勤宜顯行於招誘自用軍已來應有諸軍及諸色負罪逃背諸處人等限一百日內許所在陳首竝不問罪却與放管如限內不出復罪如舊諸州府應有見禁此色人家口骨肉竝從釋放恩隆加等固有明文道在恤孤宜弘異渥自去年出師來諸軍將校有沒於王事者子孫竝與量才叙錄臯陶五刑旣從流放商王一德用解網羅想其憔悴之容爰示哀矜之道應貶降官與量移已量移者與復資流配人等竝放還仁及枯骨渥渥重泉瞻哲后之芳蹤乃有國之令典魏府管內用

軍已來墳墓所毀無主者委逐處官吏指揮隨事修整祭奠仍費官中支給賦歛未省杼軸猶空言念疲羸聊得蠲貸諸道州府營田戶部院務省莊等天福元年秋夏租課錢帛斛斗諸雜物色等除已納外應有逋欠竝與蠲放於戲萬靈蠢蠢生成咸賴於上玄六合茫茫舒慘悉由於元首朕每興念慮莫釋焦勞遂覃在宥之恩將合好生之德朝野士庶中外臣僚體予蕩蕩之懷而贊我巍巍之治無怠於協謀戮力共期於偃革修文益勵乃誠永俾寡德布告遐邇咸使知聞

六年八月己亥帝至鄴壬寅制曰自昔聖皇明帝膺圖受命必觀風而設教或展義以省方上則順彼天道下則從其人欲朕創開基業每遵舊章期四海之混同法五載之巡狩乃睠全魏肇啟新都頃屬經綸嘗茲潛躍宜從望幸俾慰來蘇遂整明鑿旋臨舊地雷雨作解式覃曠蕩之恩日月無私用廣昭臨之道應三京新都諸道州府天福六年八月十五日昧爽已前諸色罪犯已結正未結正已發覺未發覺罪無輕重嘗赦所不原者咸赦除之其持杖行劫并殺人賊免罪移鄉仍配逐處軍都收管其犯枉法贓人雖

免罪即不得再有任用或始因罪犯久處竄流特行洗滌之恩各遂歸還之望應配流人并已前途赦不在放還人等并放還徒罪年限未滿者並放偶負瑕疵爰從黜降俾量移於近地宜漸復于舊資應貶降官等未量移者與量移已量移者約資敘進用或歲因災沴民用艱辛久係逋懸宣示蠲免應欠天福五年終已前夏秋稅租并公徵諸色及營田租課並與除放朕頃當開創爰在并汾或傾歸順之心首謀翊戴或擁驍雄之旅力效推崇洎汜水興妖鄴城伐罪每令致討皆立奇功漸臻開泰之期愈念艱危之際

宜頒殊渥允答茂勲應河東起義之初佐命效順收復鄴都汜水立功臣僚將校等竝與加恩其亡歿者更與追贈子孫已有官職者與遷改未有身名者與叙用經過郡縣迎奉乘輿既供億以爲勞宜旌酬而示寵自東京至鄴都公路供頓官員職掌等竝與加恩六飛行幸萬騎扈從慮旁午於路岐微損傷於苗稼應公路有傍道稍損却田苗處其合納苗子及泮徵錢物等據畝數竝與除放載念雀臺昔居侯服撫綏六郡臨蒞四年睠彼職員依然父老無惟推恩之典仍敦尚齒之風鄴都并相澶貝博衛等州官負職

掌內有頃歲潛龍時在職者竝與加恩管內耆老八十已上者竝與版受上佐官爲國之規利物爲本農器俾從於改革畊民必致於便宜諸道鐵冶三司先滌甕百姓農具破者須於官場中賣鑄時却於官場中買鐵今後并許百姓取便鑄造買賣所在場院不得輒有禁止攪擾擢文武之才今之急務旌孝義之行古有明文贊治道以克隆致人倫之式序山林草澤內有文才武藝爲衆所推者委長吏切加搜訪具以名聞當議量才叙用孝子順孫義夫節婦竝與旌表門閭天覆地載無所不容改過自新於斯爲美應

亡命山澤負罪潛藏者並放罪招携各令歸業所在切加安撫如過百日不出者復罪如初唐室忠臣鄴臺靈廟濟蒼生於一境正皇統於中區宜命褒崇用彰激勸唐梁國公狄仁傑與追贈官秩主掌曠敗錢物逋懸宜示矜容聊加蠲免應天福三年終已前諸色場院官欠負官中錢物人等累經徵理通勘實無錢物家業者並與除放其人免罪任從逐使不得再任使無黨無偏徇至公之道去泰去甚戒求利之心私下債負徵利已及一倍者並與除放如是主持者不在此限邊陲管界藩部經繇言念疲羸良深軫恤

析代蔚弁鎮州管界內有經藩部踐踏却苗稼者其合納苗子必徵錢物等據項畝與除放其經燒蕪舍室殺傷人命者據戶下合徵苗稅並與除放於戲居域中之大爲天下之君按巡旣展於盛儀渙汗宜覃於慶澤人情允洽帝道有光更期忠盡之臣未贊隆平之運布告遐邇知朕意焉

七年正月戊午以收復鎮州曲赦廣晉府禁囚及襄州鎮州惡黨一百餘人

少帝以天福七年六月卽位七月庚子御正殿制曰古先哲王開創丕業未嘗不櫛風沐雨旰食宵衣安



黔首於八紘保鴻圖於萬世恭惟先皇帝艱難啟運  
恭儉臨朝以武功定寰區以文德安黎庶日慎一日  
無怠無荒載洽隆平永傳丕構顧惟冲渺獲奉纂承  
念負荷以爲難集哀摧而罔極期終喪制旋逼羣情  
竭推戴以彌堅執讓辭而不獲勉臨大寶以御兆民  
宜頒在宥之文用布惟新之澤可大赦天下應天福  
七年七月十七日昧爽已前四京及諸道州府諸色  
罪犯除十惡五逆殺人強盜官典犯賊合造毒藥屠  
牛鑄錢諸色僞造外其餘罪犯已結正未結正已發  
覺未發覺咸赦除之已前諸色配流人等除終身不

齒嘗知所在縱逢恩赦不放還人及曾爲強盜已配  
諸處收管人外其餘並放還其今日已前放還人內  
舊有職官者量與叙用弔民伐罪用遵懲勸之恩改  
過自新必務含弘之道其襄州安從進如能果決推  
誠一稟朝旨並從捨釋各與官榮朕恭承顧命初嗣  
丕基而文武羣臣中外良佐肅清輦轂保佐國家備  
彰忠孝之心咸竭推榮之力宜覃恩渥用表旌酬在  
朝內外臣寮侍衛諸軍將校及諸道節度使防禦團  
練刺史並與加恩修奉園陵考詳故實務遵禮典副  
朕孝思凡曰在官悉能陳力爰逢昌運宜示溥恩諸

道賓幕將校職員見任京六品已下官州縣官三司  
場院監冶帶使額者普與加恩其諸道職員押衙已  
上與轉官兵馬使已下與轉職懸車官秩前任職資  
載敦尚齒之風爰示念功之典致仕官前任文武朝  
臣內諸使司已下前任節度使防禦團練刺史行軍  
兵從少尹上佐官前諸道都指揮已下前任京六品  
以下官及前資州縣官帶使額場院官等並與加恩  
京師職掌夙夜勤勞竭力有聞推恩無吝應在京諸  
司職掌亦量與恩澤奉守文之業敦孝治之風宜加  
幽顯之恩用慰哀榮之意內外臣僚內諸司使及侍

衛諸軍指揮使已上父母在者與官封已下有官封別  
與遷改已亡歿者並與封贈已有封贈更與妻封贈  
其有郡邑國號者與進封未有着者與叙封魯竭臣誠  
歿於王事良深悼往宜示賞延自天福元年後來文  
武臣僚終有歿於王事與追贈已追贈者更與追贈  
有子孫未有職官者與錄用蝗虫作沴苗稼重傷特  
示欽蠲俾令蘇息應諸道州府經蝗虫傷食苗稼者  
並差官檢覆據所損頃田與蠲放稅賦仍委逐處長  
吏切加安撫務令存濟山林逸士草澤遺賢將裨教  
化之風宜廣搜羅之道應有懷才抱器隱遁丘園者

委隨處長吏切在搜訪具以名聞敦崇孝義旌顯門  
閭式恢王化之基用正人倫之本應有孝子順孫義  
夫節婦委逐處長吏具名聞奏當議旌表於戲纂繼  
大業司牧羣黎小心必本於舊章恭已難忘於朽索  
不敢逸豫以召和平更賴將相大臣文武多士遵顧  
托於先帝永翊戴於冲人間保延洪爰覃渥澤報告  
遐邇咸使聞知赦書日行五百里敢以赦前事相告  
言者以其罪罪之

八月丁亥以襄州安從進平詔在城官負將校職掌  
等蓋被脅從素非黨類除已送赴闕外其餘一切不  
問自圍閉已來餓殍不少言念疇寃之魄宜行掩骼  
之文應有餓死及殺戮并安從進毀拆邨墳墓暴露  
骸骨等竝官與埋瘞仍令致祭諸道商旅或有被安  
從進威脅配軍者竝仰給與公憑放歸本貫內有淮  
南商旅亦給與公憑放歸纂嗣之初收復之始特行  
軫恤用表渥恩宜令三司依此施行仍付所司九月  
癸未御乾明門觀襄州行營都部署高行周等獻俘  
馘曲赦京城禁囚  
八年二月庚戌御札取今月十一日還幸東宮己未  
發鄴都曲赦禁囚辛酉幸澶州赦獄囚

五月甲辰勅曰朕荷上天之眷命守先帝之丕基日  
午坐朝恐一物之失所夜分不寐思比屋之可封身  
雖安於九重心嘗懸於億兆屬飛蝗作殄膏雨久愆  
流民倍切於撫安征賦頻令於蠲減未能感召深軫  
焦勞念獄訟之繁當炎蒸之候欲臻和氣宜去深文  
特行寬大之恩用叶哀矜之旨應三京鄴都諸道州  
府見禁罪人除十惡行劫諸殺人者及僞行印信合  
造毒藥官典犯賊外人犯死罪者減一等餘竝放內  
有欠官錢者宜令三司酌量與限監出徵理中外遐  
邇宜體朕意

開運元年七月辛未朔御崇元殿降制曰王者化家  
爲國旣開創以惟難纂業承基亦負荷而尤重朕虔  
承遺命嗣守丕圖顧眄躬而懼不克堪持小心而曾  
無暇逸外以生靈是念內以宗社爲憂若涉大川如  
馭朽索然猶功非及物德不動天蟲螟爲害苗之灾  
夷狄作亂華之患尚賴謀臣猛將義士勇夫共成戡  
剪之功復致澄清之運今則狂戎逃遁年谷豐登時  
屬小康禮當終制雖三年無改義欲化於人倫而正  
朔有嘗理宜新於鳳曆爰布改元之令仍覃在宥之  
恩天福九年宜改爲開運元年可大赦天下應今年

七月一日昧爽已前三京鄴都諸道州府見禁囚徒除十惡五逆光火劫殺屠牛鑄錢官典犯贓僞行印信合造毒藥外罪無輕重已發覺未發覺已結正未結正咸赦除之流竄之徒其實有咎和平之道亦許自新其流配人除終身不齒嘗知所在人外未經量移者與量移已經量移者與叙用蟲蝗災疾之邦流夷頗甚獫狁經過之地凋弊尤深須議優饒用明軫憫其岐雍同華蒲陝涇邠耀威管內人戶委長吏切在招携復業之家免一年租稅魏博貝冀滄景德等州曾經虜騎剽攘特放今年秋稅其餘經過之地亦

量與矜蠲乃睠親軍實推忠節或從征醜虜顯立勲勞或出討叛臣方期平定至於邊陲守戍藩鎮分屯盡繫捍防皆施勤効雖賦稅未集帑藏猶虛宜示頒宣用明獎賞應將校兵士量與等第優給連年失稔嘗賦憊期國用未克軍須不足是行率借以濟贍供誠非欲爲蓋不獲已赦書到日盡時罷征出彼家財資予國力宜加甄別以示優隆出一千貫已上者特免科徭出一萬貫已上者咸授官秩無資給者與本處上佐有官名者依本品序遷謁彼臣誠沒於王事恩宜加等禮有明文當契丹侵犯之時有守城臨陣

盡節亡身者宜令逐處長吏以名術奏聞當議超加  
褒贈或孫或子竝與旌酬含垢匿瑕捨過宥罪前王  
令典有國通規應有曾行劫盜之人竝宜放罪願在  
軍者與配軍收管願歸農者委本縣安存務局因循  
職掌敗闕空係連懸之數徒行徵督之文宜示哀矜  
竝令除放於戲承祧繼統御極居尊雖旰食宵衣每  
勤庶政而利兵秣馬未息殷憂更賴四輔三公五侯  
九伯文武叶力上下同心竭彼忠貞佐予寡昧舉朝  
廷之急務盡軍旅之沉謀使鼓卧旗偃俾成寧謐同  
文共軌速洽隆平表乃有功致我無事

閏十二月乙酉以牧青州制曰高祖皇帝應天順人  
化家爲國勤勞庶政安輯四方御衆以寬懷遠以德  
高秩厚祿以獎勲勞推食解衣以重賢戚至于匹夫  
匹婦皆被亭毒之恩草木昆蟲悉覃忠厚之德朕恭  
承丕訓嗣守宗祧奉以周旋不敢失墜兢兢業業若  
涉大川所賴將相公卿同德比義共扶不逮庶洽於  
隆平而揚光遠頃以微功驟升亞將後承僞命來拒  
義師始則爲桀犬吠堯終則背楚降漢先皇帝方弘  
大義推以赤心忘彼仇讐歡如魚水亟承重寄久縮  
親軍累典大藩亦兼重鎮邇後選男尚主待之以懿

親裂地封王寵之以極致人臣之盛近代無儔至於諸子之中皆擢爲牧守家臣之內多有遙領郡符比外有非理邀求違法僭濫國家務存終始悉與含弘柰何自至滿盈不勝富貴恩深致怨物盛乃衰而輒信姦邪虛有怨望聞我大喪之後乘我饑饉之年外則勾引蕃戎倚爲勢援內則竊據城壘潛肆窺覷遂使河朔數州頓成瘡痍青丘一境獨陷尉羅朕所以命將興師吊民間罪然猶堅壁拒命自夏徂冬固執其迷自稔其惡其子楊承勳見衆情之携貳知孤壘之困窮深懷滅族之憂遂有悛心之請解其戈甲待

罪軍門梟彼兇徒而傳首於闕下氛霾遽息中外同懽此皆宗社降靈乾坤眷祐將帥戮力士卒齊心掃千里之封狐不爲民患除三穴之狡兔甚泰物情念彼一方未能高枕宜行在宥用拯疲羸可取閏十二月十七日昧爽已前應諸州管內州縣見禁囚徒已結正未結正已發覺未發覺罪無輕重咸赦除之拾爵策勳前王之令典錄功旌義有國之嘗規應收復青州將投兵士等一自征行再罹寒暑頻親矢石備歷艱辛賊壘旣平秋毫不犯雖已行頒賚而更議甄酬厚秩美名我無愛惜其將校自副兵馬使已上員

僚并監押使臣竝與加恩十將已上各賜功臣名號  
已有功臣者更宜改賜自楊承勳納款歸明楊光遠  
亦拜章請罪朝廷務弘恩貸而特與全生既許自新  
終懷憂懼遂至疾作以及亡身雖悖逆之人衆所憤  
怒在君臣之分朕實憫憐斷棺戮屍情所不忍其楊  
光遠尸首許令骨肉收葬楊承勳比從頑父同作不  
臣志力既窮覆亡可待而能轉禍爲福全身保家果  
傾嚮義之心所謂見幾而作宜加恩澤以示獎勵其  
楊承勳宜與起復除授防禦使仍加官秩其一家骨  
肉竝放罪其弟承祚承信已在哀制放歸私第烈火

焚山始識珪璋之性嚴霜殞夜方知松栢之心適當  
危亂之時乃見忠貞之節故淄州刺史翟進宗清風  
凜物貞骨凌秋當光遠跋扈之初被逆黨脅驅之際  
而伏節守義經死徇忠終異叛徒以及遇害雖已行  
褒贈而未稱朕懷宜覃延賞之恩仍示殊嘗之禮其  
翟進宗靈襯委本處類會本人骨肉加禮歸葬葬事  
官給其子仁欽可特授官資補充東頭供奉官去順  
效逆頗蠹人倫濟惡助姦難逃國典前登州刺史張  
萬迪恩隆郡寄顯受朝恩不能事君盡忠輒敢從人  
於亂備彰逆節須舉明章其張萬迪宜從別勅處分



尚在寬宥特免族誅其骨肉竝從釋放國家兵士恩澤頗隆賞賜以時衣糧甚厚其中有凶惡之輩輕狡之徒不顧妻孥輒背軍伍如期僥倖難追嚴誅其青州城下兵士有走投入賊城者竝令指揮殺戮所有逐人骨肉宜從釋放叛城旣下汚俗宜新同惡者皆就勦除詭隨者竝從停廢其餘誑誤宜示矜寬其楊光遠下惡黨皆已梟首所有隨幕賓從除已殺戮外餘皆配送邊遠州府嘗知所在終身不齒縱逢恩赦不在放還之限其在城及管內州縣鎮負僚將校曾被楊光遠脅從者一切放罪亡命之人比來懼罪所

宜招諭却復耕農自楊光遠作叛已來或有鄉村百姓接便遞相劫殺逃竄山林者竝皆釋放仍委本處官吏明宣朝旨招喚歸業如救命到兩月不歸者復罪如初當令擒捕顯行刑戮其莊田物業亦許力及人戶請射佃蒔忠力之士稟君命而不避危難良善之人入亂邦而橫遭迫脅羅茲患難實可憫傷自楊光遠作叛之初應有差去使臣非理而死者如子孫量與量才叙用攻圍之際役使實煩凡有區分皆繫急速稽緩者固當抵罪辨集者豈惜酬勞應青淄登萊交沂密鄆齊棣等州職員州縣等曾部署輦運者

竝與加階減選及轉官加職軍旅所至雖切戒嚴營寨所經寧無踐食宜寬嘗賦以慰編氓自王師攻討逆賊大軍下寨之處所有田苗桑棗應遭蹂踐砍伐宜委本處官吏子細通檢除今年見苗供輸外來年夏稅竝與放一半其去青州三里內更免今年秋夏殘租興師動衆勞費生靈或則負番錘以從軍或則徵輦運而赴役疲於供命不暇息肩言念蒸黎宜加優恤應青州管內及鄆齊棣兗沂密等州諸縣人戶自攻討已來差役科配頻併其今年夏麥殘欠并公徵錢物竝與除放所有逃移戶口宜令逐處長吏切

加招携青州城市居人等久經圍閉頗是凋殘楊光遠率彼資財奪其糧食至此餓殍宜示憫傷其在城見在貧民委本道以食糧賑恤所有城內屋稅特放一年應洞子頭及城下夫役有遭矢石致死者宜令逐處長吏子細通勘與放二年徭役城郭之內餓殍極多墟墓之間暴骨甚衆方隆渥澤豈限幽明其青州城內餓死百姓及城外墳墓曾遭發掘者竝令本道掩藏埋瘞於戲亂嘗干紀天地不容負國欺君人祇共怒是知福善禍淫之道信而有徵孤恩背義之人敗不旋踵今則干戈少息海岱已寧凡在股肱更

思康濟庶臻治道同享升平布告寰區咸知朕意  
二年五月丙申朔御崇元殿受朝制曰堯仁御極尚興  
丹浦之師軒后承乾亦有阪泉之戰是知五材並用  
王者不能去兵四氣同功天道不能止殺朕自躬傳  
神器勉徇人謀戢干戈而寧耀武威撫夷狄而但修  
文德而契丹見利忘義負約渝盟大爲猾夏之灾屢  
肆窺邊之暴須爲民而除害遂命將以伐戎駐五輅  
於大河勞六師於極塞賴乾坤祐助社稷威靈將相  
一心貔貅戮力致羣兇之敗衄血滿平川使元惡之  
奔逃魂消廣漠今則朔陲稍靜中夏小康宜上答於

穹旻俾特施於赦宥用導和平之氣適符長養之風  
可大赦天下開運二年五月二十一日昧爽已前應  
三京鄴都諸道州府見禁囚徒除十惡五逆持杖殺  
人強盜官典犯賊合造毒藥屠牛鑄錢僞行印信外  
其餘罪犯已發覺未發覺已結正未結正咸赦除之  
諸色配流人除終身勿齒并縱逢恩不在放還人  
及曾爲盜賊并自契丹內來諸色人已於諸處收管  
外其餘配流人并嘗知所在者並放歸其開運二年  
正月一日後來配流人等不在放還之限兵戈之地  
可料傷殘惻隱之心不捨晝夜所宜優惜用恤疲羸

應嘗定邢貝相并鄴都已北管界自今年契丹犯境已來有人戶實經虜殺劫人者所通檢到夏苗十分已令減放二分苗子并泐徵錢物今更特減放一分其今年徵正稅錢物等亦與十分內減放二分行幸之時往來之處奉迎不闕供億實繁宜示渥恩以獎勤效應滑澶兩州迎奉車駕并泐路供頓官員職掌等仰逐處具名衙申奏當與加恩出師已來遇敵之處忠烈之士皆效命以衝鋒行陣之間遂損身而報國宜加延賞用慰真魂應北面行營將士等除已與加恩及第支賜優應給外其有沒於王事者職員宜

令逐處分析聞奏當議超加褒贈子孫已有官者當與叙用其節級長行等如有親男堪充征行者宜令逐處酌量配軍收管支給衣糧戎夷侵軼驅脅吏民雖陷虜庭旋歸漢境所宜慰納以示綏懷應近北泐邊州縣軍鎮官員職掌被契丹脅權入蕃得便逃得歸來者竝放罪仍仰切加安撫睠彼易水最處邊陲經戎虜之攻圍賴軍民之固守將投齊一生聚保全念此忠勇宜加旌賞其易州被契丹圍逼之時應在州守把城池刺史官員職掌等仰具名衙申奏竝與加恩征討之際饋運之民不唯飛輓之勞或有抄截

之患宜令存恤用示優弘應鎮定刑維先差隨軍運糧百姓偶有不廻者委逐處用勘如有此色其本戶骨肉切加安撫免三年差徭俶擾之際輕俠之徒而偶聚盜於崔蒲遂亡命於山澤宜令招携俾復農桑訪聞鄆齊棣等州管界及河北諸縣百姓內有昨因蕃賊入界接便爲非今遇安寧怕罪未來歸業者宜令逐處長吏徧行榜示告諭所有今月一日已前罪犯一切不問宜令竝放歸田業各務營生仍委縣鎮鄉村切加安撫不得恐動如告諭後過百日不來歸業仍前爲惡者復罪如初逃背軍都誠爲極罪誅夷

家口乃是嘗刑將議寬矜并從捨釋應諸州府見禁及本營枷項并嘗知所在諸軍逃走兵士家口等竝宜釋放場院積弊官吏承寬致課額之逋懸勞朝廷之徵督久淹刑獄深軫予懷爰示優容俾令除放其安邑解縣兩池前催鹽使王居敏王景遇禁盤鹽欠折軍將兩界逋懸累年禁繫宜令三司各詳逐人所欠如有人家業錢填納者可與盡底據數納官餘欠竝本人竝放如有欠負錢物數內全無家業錢物填納者宜與免死配送邊遠諸處收管仍永不得差使所欠特放河中府雍同華陝虢等州管界內人戶有

欠王居敏王景遇盤盪脚價者竝特放於戲鴈磧方  
 秋稍息烟塵之患雞竿肆赦是覃雷雨之恩更賴文  
 武大臣中外宿德或決策巖廊之上或提戈軍旅之  
 間嘗膽為懷摧凶是念速除餘孽共集殊勳克致澄  
 清永銷氛穢仍遣赦書日行五百里敢有以赦前事  
 相擾告者以其罪罪之布告遐邇當體朕懷  
 冊府元龜卷之九十四終

冊府元龜

淮南李嗣京奏開

西極文翔鳳訂正

豫章黃國琦較釋

帝王部 九十五

赦宥第十四

漢高祖以晉開運四年二月即位於晉陽宮稱天福  
 十二年五月辛亥至陝府釋管內禁繫罪人  
 六月甲子至東京戊辰赦曰王者興膏雨之師所以  
 蕩瑕穢下哀痛之詔所以吊傷夷朕頃自晉朝俾乂

并土屬戎夷兆亂致干戈日尋每懷如燬之憂嘗竭  
扶顛之力旋以金行失馭天驕縱暴北陷河塞南踰  
官渡盜據宮闕凌辱衣冠蹂踐我京畿處劉我生聚  
田不易墾人不聊生犬羊布於四郊腥穢聞於千里  
人旣思主朕實疚心遂乃建彼義旗整斯戎輅雪萬  
民之枉抑期九土之和平求理之端惟刑是恤况時  
當養物仁在好生爰覃解網之恩用廣泣辜之道應  
天福十二年六月十五日昧爽已前諸道州府見禁  
人等已結正未結正已發覺未發覺除十惡五逆外  
其餘罪無輕重咸赦除之三司地征六營軍費素懸

數額皆有限程但以兵革屢興旱蝗相繼蓋督吏不  
能開許致疲民無以供輸苟不蠲除轉成困弊天福  
十一年已前諸道州府應係殘欠稅租竝特除放朕  
昨風駕河汾薄狩陝號洎及京邑周覽神臯禾黍廢  
爲閑田墻屋毀爲平地悽傷滿目指顧傷心且農夫  
不耕廩食何取蠶婦不織府帛何輸言念流離諒宜  
矜恤况朕頃在藩翰備諳稼穡自臨大寶首念蒼生  
常久困於蕃戎欲盡蠲其租賦又以干戈未弭士馬  
方繁月無見糧歲無嘗給特於經費須此減除其東  
西兩京畿內遭契丹蹂踐暴苦處人牛俱喪蠶麥不

收雖近復田園固無可輸納其東西兩京一百里內今年夏稅及沿徵物色竝與蠲放其一百里外曾有契丹經過劫掠之處委本處官吏躬親恤問如實被契丹蹂踐不虐其今年夏稅大小麥苗子沿徵物色等各放一半其京城內先遭張彥澤明行拷捶劫掠資財蕪被契丹毀折屋舍括率緡錢爰屬艱危併懼殘虐爰符望幸用慰來蘇其京城內今年屋稅與減一半雨露之恩豈宜有間文武之吏咸與維新應內外臣僚及京百司并諸官吏將校等各具名銜申奏當與加恩應有契丹除授諸道節度觀察防禦團練

使刺史及令錄賓僚將吏等竝各安職任不議改更勉思共理之規更俟維新之命或曾經謫官又念投荒苟亡惻隱之恩何示炤臨之德應已前貶降官未量移者當與量移已量移者便與敘錄應該徒流者與放還近因獫狁猖狂萑蒲充斥交相劫剽不問官私遂令王事之人空有係官之數應屬省務局錢穀曾經契丹及草寇般擊處據已勘到實數仰三司具指實條奏當議別有指揮應係欠省司錢物尚令逐處徵催全放則因便生姦加罪則困窮可憫宜下三司據見有家業抵當外如實無充折者特貸餘生更



無任使亡命不逞之徒殘民蠹物之類或隱藏山谷或畏懼典刑及今日已前結集爲非者竝不問罪仍令所在長吏丁寧曉諭如願在軍都者量材安排如不願在軍都者卽任歸農業與限兩月明示招携如限滿依前結集爲非不議寬恕卽嚴加捕捉復罪如初浚都重地汴水名區控襟帶於八方便梯航於萬國眷言王氣允稱皇居其汴州宜仍舊爲東京朕以肇興寶曆克嗣炎精遐迩追雍雒之宏規仰仗高光之盛烈其國號宜改爲大漢朕始事晉以至開國雖易服建號固有通規念舊懷恩未忍改作其年號仍舊

稱天福於戲帝王之道亭毒爲先黃老之言清淨爲本用示滌瑕之典宜敷作解之恩矧惟臨馭之初方屬艱難之運當欲盡除疾苦漸致康寧用遵置器之方庶減納隍之慮凡在遐邇宜體朕懷

十月甲申北巡至韋城制曰自古聖帝明王開基創業輯寧庶彙康濟四方行寬大之恩不遺遐邇布含弘之德無隔華夷頃屬前朝季年中原失馭蒸黎板蕩寓縣分離寰區爲戎虜之鄉宮闕作腥羶之地百萬之生聚俱陷虎狼數千里之人煙頓成荆棘朕屬茲多難思庶生民憫晉祚之覆亡憤胡塵之紛擾繇

是痛心疾首躍馬提戈慕大業于高光起義師於汾  
晉匈奴運盡魁首天亡殘孽遺妖奔巢走穴繼平凶  
醜再造乾坤盡復諸華不失舊物顧惟眇質獲荷寵  
靈怵惕于懷憂勤在念朝野亂離之後國家開創之  
初每慮德澤未優炤臨尚狹懼一夫之不獲恐一物  
之乖宜思濟艱難靡遑宵旰大河之北易水之南久  
因兵戈聚成瘡痍男孤女寡十室九空念此興懷潛  
然出涕近者北地州府相次歸明觀千里之坦夷顯  
羣心之忠順今則方當展義爰用省方宜弘及物之  
恩用廣惟新之澤應鄴都管內及邢洛慈相衛鎮深

趙貝冀博滄景德易定祁秦等州管內應見禁罪人  
取十月五日昧爽已前已結正未結正已發覺未發  
覺嘗赦所不原者咸赦除之自契丹爲患已來逆虜  
所至之處劫掠之外殺害實多方布仁慈豈限存歿  
應河北曾經契丹殺害處所有無主骸骨竝仰所在  
長吏勤加指揮收斂埋葬其有官員將吏歿於王事  
及曾被契丹脅從指使返遭殺害者竝可搜訪逐人  
子孫及親嫡骨肉具名聞奏當與量材任使必令存  
濟捨過錄功方務含垢逋亡服叛惟切推誠契丹節  
度使麻答見在定州自前曾輸款誠欲來歸順已降

詔諭想計聞知當俟傾心別加殊渥幽燕瀛莫舊屬  
蕃戎惟彼生靈久遭屈辱近知軍民憤激志願歸明  
苟能密設機謀審圖禍福必然成事終享功名上郡  
雄藩當用酬獎鎮州殺僂契丹之時軍人百姓竝立  
勛効其軍都將校員察已行恩澤訪知百姓闔敵之  
際死傷甚重聽聞已來傷歎尤切其逐人本家宜令  
本道常加優卹向者有漢地諸色人員隨契丹北未  
能歸還去國離鄉益加憫念其本人骨肉仰所在存  
卹倍加安撫先有諸色人曾伏事著契丹官員者一  
切放逐穩便所在不得動搖於戲上天悔禍黔首愛

生敢忘兢慎之心冀合升平之運凡在黎庶當體朕  
懷

乾祐元年正月乙卯制曰昔我藝祖神宗開基撫運  
以武功平禍亂以文德致昇平澤潤生民慶流長世  
淳耀之德不泯延洪之業無窮肆予冲人猥集大命  
荷上穹之眷祐揚列聖之耿光底定四方奄有萬國  
纘堯承緒欽若未圖嗣夏配天不失舊物乃者有晋  
失馭羯賊亂嘗蛇虺肆毒於寰區豺狼暫穴於宮闕  
虔劉我生聚俘掠我吏民戎馬所經人煙殆絕海內  
無主天下騷然朕方在躍潛過茲屯難秉旄誓衆憤

其家國之仇冒暑出師雪彼生靈之怨皇天后土悔禍誘衷胡虜喪亡遼碣潰亂腥羶屏氣屬縣歸心披六轡而嚴厲車克寧西道走空函而飛折簡遂定中州旋以王業尚難魏郊斯梗當思康濟爰議省巡一方旣靜於煙塵九野漸期於清晏今則已旋魏闕正屬王春三陽布和四序更始便宜宣德澤以順發生紀號易年式顯鼎新之祚宥過懋德載覃渙汗之恩可大赦天下改天福十三年爲乾祐元年自正月五日昧爽已前犯罪除十惡五逆外罪無輕重已發覺未發覺已結正未結正咸赦除之諸貶降官未量移

者特與量移已量移者與復資敘用諸色配流人並放還鄉里其除名不齒者量與敘錄諸處散闕場院官自前有因繇欠折卽日並無抵當灼然無可徵督者宜令三司勘覆聞奏豐阜之道耕種爲先宜伸勸課之條以重衣食之本應天下戶口夏稅見供輸頃畝稅賦外一人任戶開墾荒地及無主田土五年之內不議納稅亦聞自前有此指揮始卽許其開耕旋乃却行簡括旣非誠實顧失緝綏朕以化理域中信敷天下必無改易庶廣耕桑宜令所在長吏明行曉示自中原板蕩編戶瘡痍凶歉荐臻逋逃未復加以

徵賦煩重差配頻仍言念疲羸宜伸撫恤比聞州縣調役未甚均平秋夏供輸不依條制生靈受弊胥使成奸宜儆尤違俾循軌度所有逐處戶口宜令觀察使刺史縣令設法招緝除宣省指揮外不得非理差配其合充色役人戶不許官吏州縣影占務均苦樂其秋夏輸納只依朝廷指揮受納不得有加耗取覓若或差人察訪不虛其主者監官必加深罪更在藩侯郡牧共理分憂嚴設科條以副委任一昨親征鄴部暫駐野營周覽鄉川備觀凋瘵所宜優恤以召和平其鄴都四面人戶去城三十里內所有天福十二年賦稅并緣徵一物以止并可特放其無主破毀墳墓仰差官吏如法掩瘞兵荒之際寇盜連羣自朕始及京師以宣赦宥尚聞結集未復家園豈非告諭之未嚴慰撫之未至今則陽春資始東作將興雨雪及時耕桑有望所宜各歸營養自取安全式敷在宥之恩載啟自新之路應諸處有前自爲非惡迹之人一切放罪不問便可安家樂業各歸營農所在不得動搖赦書到後仍與限一月若不歸本家復罪如初當令緊切擒捕心無矜恕仍別有條理指揮恭惟列祖園陵諸聖祠廟桑田變海當時之弓劍猶存精爽在

冊府元龜 帝王部 卷之九十五 八

天終古之威靈不泯載惟追感誠切永懷其雍州西京及諸州府應有諸帝陵廟仰所在修奉務令完葺國家大事惟祀與戎苟蘋藻之不虔則神祇之安享起今後允有祠祭所供用之物務在豐潔宜令有司精細點簡向者桀虜亂華或有抱幽寃而沒地王師薄伐或有徇忠節以殞身念彼遺魂宜覃霽澤自國家舉義已來應有將校臣寮沒於王事及晉朝臣寮枉遭契丹屠害者竝與追贈如已追贈爵秩未高者更與贈官仍令搜訪子孫量材敘錄朕昨展義省方計遣伐叛適當平定且錄勤勞應扈從鄴都城下內

外文武臣寮及馬步諸軍將校并在京部署巡檢官員職掌諸軍將校等升除已行恩命外所有未曾加恩者宜令中書門下條舉聞奏兼鄴都以來沿路州縣迎奉大駕供饋宿頓糧草無遺闕處其職掌及州縣官吏竝可等第甄錄天下名山大川聖帝明王忠臣烈士祠廟墳墓委所在量事修葺自唐莊宗後來應有文武大臣功德昭著者其凌替子孫量與敘錄其有先曾仕契丹并有骨肉見在契丹者其本人本家所在切須安存不得妄有恐動朕昔在藩邸頗熟臣寮文武之才嘗備觀其梗槩方員之用宜更察於

精微俾取質于衆多庶無遺於後造應文武嘗參官  
仰准唐建中年故事上任後三月表舉一人自代軍  
國之費務在豐財關市之征資於行旅所宜優假俾  
遂通流應天下商旅往來所在竝須饒借不得妄有  
擾勒卑宮菲食前代之令猷革舄綈衣哲后之明德  
至於損上益下惜力愛人冀息煩苛漸期富庶所有  
乘輿服御後宮費用太官嘗膳一切戒損在京及內  
諸司竝天下州府除應奉軍期急切外其餘不急之  
務非理營造竝皆停罷免致勞役徵聘丘園免遣邦  
彥恢張名教俾厚人倫應有蘊蓄器能精通理道文

理該博武畧縱橫而退遁於家高尚其事者委听在  
訪尋當俟徵用義夫節婦孝子順孫仰具聞奏卽議  
旌表於戲創業惟難守成非易敢忘馭朽思致偃戈  
更賴文武股肱藩后同心康濟勦力弼諧永冀隆平  
共臻仁愛凡在戴履宜體朕懷赦書有所未該者委  
有司舉奏赦書日行五百里敢以赦前事言者以罪  
罪之

隱帝以乾祐元年二月辛巳即位癸巳制曰古先哲  
王繼天御物必有大造被於生民故能流餘慶於子  
孫保未圖於宗社我國家本惟堯之洪緒襲有漢之

耿光曆數有歸謳歌所屬先帝乘時出震應運開國  
爰在初潛適丁難否妖孽盜居於宮闕腥羶肆毒於  
寰區血肉黔黎荆榛赤縣繇是建靈旗而措敵伏黃  
鉞以誓師逐逋寇於龍荒救含生於虎口遺身利物  
功德契於三靈以欲從人潤澤流於八表大統旣集  
仙馭俄遷號慕終天殞越無地肆予小子獲纂丕基  
上承顧命之嚴下迫羣臣之請遺弓如昨仍几具存  
瞻黼辰以推心處苦廬而瀝血而文武庶尹將相大  
臣連上封章請臨政事固拒雖切敦勸彌堅蓋負荷  
於耿躬復祗膺於永命諒難固執須強荒羸恭已祝

朝載惟感咽向明而治始聽斷於萬機作解之恩宜  
昭宣于四海可大赦天下取二月十三日昧爽已前  
所犯罪有已結正未結正已發覺未發覺罪無輕重  
嘗赦所不原者咸赦除之諸左降官未量移者與量  
移已量移者與復資已復資者與叙用應諸有盜賊  
處宜准今年正月五日所降恩赦放罪招携宜令所  
在長吏更切曉諭招喚各令歸業安家營養竝不問  
以前違犯仍倍加安撫文武臣寮侍衛將士赤心爲  
國勩力勤王盡節盡忠同心同德輔翊先帝推戴冲  
人言報忠勞宜伸渥澤應中外文武臣僚將吏各加



恩寵其馬步諸將軍兵士等各賜賞給已從別勅處分尚念國家多事帑藏尚虛賜賚未優良深媿意兵火之後災沴相仍編戶傷殘比屋貧弊重以科徭未息輸歛不時言念瘡痍宜伸蠲復天福十二年終已前殘欠秋夏稅賦及和糴沿徵一物已上並特放所有編經災沴處開封府滑曹鄆宋毫單潁徐宿兗沂密孟鄭懷衛澶濮等州并濮城四面三十里內共二十處除已放去年殘稅外宜更加軫卹其今年夏麥苗子於舊額上特與放免一半頃經戎虜所在驚駭於場院課程州府管係既有陷失宜示矜蠲應州府

縣鎮遭契丹草寇及軍都更變驚却兼有般送綱運已離本處沿路遭劫奪諸色錢帛一物已上兼天福十二年六月終已前諸州府鹽麩商稅鉄冶不敷課利及主持錢物粮草柴蒿敗闕欠折等一切特與除放其主事人員亦放罪其有契丹犯關之時諸州府有危疑之處分差兵士守把城池逐急將係省錢物充兵士優給犒設諸道州府有去年六月終已前全分支却將士春冬衣賜及諸色諸受自來累行徵納者竝與檢驗除破先是諸州府被契丹率配到錢物逐處差人管押送納有欠折者勘驗指實竝與除破

天福十二年六月終已前逐處收刈到芟草積年損爛及欠少處竝令除放孝治之道不獨其親况推許國之忠俱享承家之慶感霜露者宜覃漏澤奉晨昏者亦示寵章立身揚名于斯爲美在朝文武臣寮內諸司使及侍衛諸軍都虞侯已上諸道節度防禦團練刺史并見在節度副使行軍司馬藩方馬步軍都指揮使父母祖父母見存者竝與加恩亡歿者竝與追贈追封已追封追贈者更封贈禮稱助祭詩美作賓誠歷代之嘉猷盖近朝之闕典興衰繼絕宜舉舊章其唐晉兩朝可求訪子孫訪立爲二王後州縣之

職朝廷命官旣曠事者有懲豈奉公者無勸諸處令錄主簿在任顯有殊績善於勸課招輯徵科靜辦者委所在具以名聞當加優獎仍以時經多事民未小康每念疲羸倍懷軫惻天下州縣戶口除宣省指揮外不得輒有科配徭役如合充色役者竝須定奪允當其力及大戶竝不得諸處投名影占稍違科條當舉典憲古者慮政教之紕繆詢理道于芻蕘盖欲使外事不壅於中下情得通於上言路旣廣頌聲則聞况在纘承之初實繫忠謹之說內外臣寮如有所見便於時政者可直言得失無所隱任賢勿二得士者

昌仰稽聖謨敷求時彥訪諸貞遁庶無遺才天下有賢良方正文才武畧不求進達處于沉滯者仰所在搜訪以聞名實相得當加擢任於戲建邦撫運念創業之惟難繼統承基知守文之不易績紹惟重憂思匪寧所賴列辟宗臣元勳舊德股肱王室保佑朕躬共致扶持庶無失隊爰覃霈澤用洽中區凡在昭臨當體予意

二年正月乙巳朔制曰朕以耿躬獲纘洪緒念守器承祧之重懷臨深履薄之憂屬以縣道猶艱王室多故天降重戾國有大喪奸臣樂禍以圖危羣寇幸灾而伺隙力役未息兵革方殷朕所以嘗膽卧薪廢食輟寢雖居億兆之上不以九五之尊漸異承平永安遐邇內則稟太后之慈訓外則仗多士之忠勲股肱叶謀爪牙宣力西推三叛撫其背而扼其喉北挫羣胡斷其臂而拆其脊次則巴叩嘯聚淮海猖狂纒聞矢接鋒交已見山摧岸沮寇難少息師徒無虧兼以修奉園陵崇建宗廟右賢左戚同寅協恭多事之忠大禮無闕負荷斯重哀感良深今三陽布和四序更始宣申允澤允答天休恤獄緩刑捨過宥罪當萬物之孚甲開三面之網羅順彼發生以召和氣應乾祐

二年正月一日昧爽已前天下見繫罪人除十惡五  
逆官典犯賊合造毒藥劫家殺人賊黨正身外其餘  
犯人及關連並放如河中府李守真鳳翔王景崇未  
興趙思館等比與國家素無讐釁偶因疑懼遂致叛  
違所以命將陳師徵辭問罪止期旦夕必見功收然  
以彼之提封朕之黎庶久陷孤壘可念非辜易子折  
骸填溝委壑爲人父母寧不軫傷但以屈已愛人先  
王厚德包荒含垢列聖美談宜弘濟物之恩用廣好  
生之道其李守真王景崇趙思館等宜令逐處都部  
署分明曉諭若能翻然順歸朕並待之如初當保始  
終享其富貴明申信誓固無改移其或不認推誠堅  
欲拒命便可應時攻擊尅日盪平候收復城池罪止  
元惡其餘誅誤一切不問仍預告諸軍破城日不可  
殺人放火諸處草寇等拋棄耕農聚集林藪晝伏夜  
動害物殘人前後累令剪除繼行招諭尚恐疑懼特  
示寬恩如能改過知非出來陳首者應已前所有爲  
非一切不問宜令逐處節度刺史及巡檢使明行曉  
示宜達朝廷恩旨冀其歸業嘗切撫安不得信任節  
級所繇衷私怨慟重念征討已來勞役尤甚兵猶在  
野民未息肩急賦繁徵財殫力匱衿恤之澤未暇於

疾羸愁歎之聲幾盈於道路尚以軍旅未息帑廩無餘猶稽蠲復之恩空懷愧憫之意卽侯邊烽少弭國患漸除當議優饒冀獲蘇息諸道藩侯郡守等咸分寄任共體憂勞更宜念彼瘡痍倍加勤卹究鄉閭之疾苦去州縣之煩苛勸課耕桑省察寃濫共恢政理用副憂勞凡百臣僚當體朕意

冊府元龜卷之九十五終

冊府元龜

淮南李嗣京參閱

西極文翔鳳訂正

豫章黃國琦較釋

帝王部 九十六

赦宥第十五

周太祖廣順元年正月丁卯卽位制曰自古受命之君興邦建統莫不上符天意下順人心是以夏德旣衰爰啓有商之祚炎風不競肇開皇魏之基朕早事前朝久居重位受遺輔政敢忘伊霍之忠杖鉞臨戎

復委韓彭之任匪躬盡瘁焦思勞心討叛渙于河潼  
張聲援于岐雍竟平大憝粗立微勞纔旋旆于關西  
尋統兵於河北訓齊師旅固護邊陲只將身許國家  
不以賊遺君父外憂少息內患俄生群小連謀大臣  
遇害棟樑既壞社稷將傾朕方在藩維亦遭讒構逃  
一生於萬死徑赴闕庭梟四罪於九衢幸安區宇將  
延漢祚擇立劉宗徵命已行軍情忽變朕以衆庶所  
迫逃避無繇扶擁至京尊戴爲主重以中外勸進方  
嶽推崇黽勉雖順于群心臨御實慙于涼德改元建  
號祗率于舊章華故鼎新宜覃于濡澤朕本姬室之

遠裔號叔之後昆積慶累功格天光表盛德既延於  
百世大命復集於耿躬今建國宜以大周爲號改乾  
祚四年爲廣順元年自正月五日昧爽以前應天下  
見禁人等罪無輕重已發覺未發覺已結正未結正  
嘗赦所不原者咸赦除之故漢樞密使楊邠侍衛都  
指揮使史弘肇三司使王章等以勞定國盡節致君  
千載逢時一旦同命悲感行路憤結重泉雖尋雪于  
沉寃宜更申於漏澤並可加等追贈備禮歸葬喪事  
官給仍訪子孫敘用其餘同遭枉害者亦以追贈馬  
步都軍將士等戮力協誠輸忠效義先則平持內難

後乃推戴朕躬言念勲勞所宜旌賞其員寮將士等各與等第超加恩命仍賜功臣名號已有功臣名號者別與改賜應左降官量加敘錄亡官失爵之人宜與齒用配流徒役人並許放還已歿者任從歸葬所有杜仲威李守貞王景崇趙思綰竇幕元隨親戚及諸色人先因懼罪至今逃匿者並可放還任自取便昨者犯罪人蘇逢吉劉銖閻晉卿李業侯贊聶文進郭允明及同時犯罪人等家族骨肉先已釋罪疎放其逐人所有親戚及門客元隨職掌在諸處者切慮尚抱憂疑今並釋放所在不得更有恐動內有手下

先管莊田錢穀人等已下三司點簡磨勘了日一任逐便諸處有犯罪逃亡之人及山林草寇等咸許自新一切不問各還鄉里自務營生仍仰所在切加安卹所繇節級不得褻私妄有恐動如赦到後一月不歸本業者復罪如初內外文武臣寮致仕官諸軍將較隨使職員及前任藩侯郡守文武朝列前內諸司使副使前禁軍指揮使前資行軍副使等各與等第加恩應見任文武臣寮內諸司使諸道行軍副使藩方馬步軍都指揮使如父母在未有恩澤者卽與恩澤如亡歿未曾追封贈者亦與封贈已封贈者更與

封贈晉漢以來兵革屢動賦役煩併黎庶瘡痍鰥寡  
孤惸不能自濟爲人父母爭不閱傷應天下州縣所  
欠乾祐元年二月已前夏秋殘稅及派徵物色并三  
年夏稅諸色殘欠並與除放所有澶州已來大軍經  
過之時沿路人戶恐有蹂踐兩邊共二十里并乾祐  
三年殘欠秋稅並放應河北沿邊州縣自去年九月  
後來曾經契丹蹂踐處其人戶應欠乾祐三年終已  
前積年殘欠諸色稅物並與除放仍委逐處長吏倍  
加存撫至於防守邊塞優卹疲羸利害之事各宜條  
奏自前或有拒扞契丹顯立功勞及將吏之中有歿

于王事者具名以聞當議酬獎應係三司主持錢穀  
敗闕場院官取乾祐元年終以前徵納外累經較科  
灼然無抵當者委三司分析開奏別候指揮秋夏徵  
科舊有規制如聞諸道州府別立近限催驅或逼蹙  
過深轉致供輸不易至使蠶欲老而求絲債禾未熟  
而取穀錢但無逋懸何須急暴應天下百姓納稅租  
並取省限內納畢不在促限徵督如是軍期急速卽  
不拘此例訪聞諸處人戶逃移在外者自前省司雖  
累行招携多未歸復兼知逃戶稅賦攤配居人公私  
之間未甚允當念其疾苦嘗軫于懷宜令所司商量



別行條貫庶使逃移者卽歸鄉土見居者漸遂舒蘇  
免困生靈以付勤恤藩侯郡守寄任非輕立政之先  
養民爲本每及徵賦尤要徇公其逐處倉場庫務宜  
令節度使刺史專切鈐轄掌納官吏一依省條指揮  
不得別納斗餘秤耗舊來所進羨餘物色今後一切  
停罷朕早在藩鎮嘗戒奢華今御寰區尤思節儉况  
國家多事帑藏甚虛將緩憂勞所宜省約應乘輿服  
御之物不得過爲華飾宮闈器用並從朴素太官嘗  
膳一切減損諸道所有進奉比助軍國支費其珍巧  
織華及奇禽異獸鷹犬之類不得輒有貢獻諸無用

之物不急之務並宜停罷帝王之道德化爲先崇飾  
虛名朕所不取苟致治之未洽雖多端以奚爲今後  
諸道所有祥瑞不得輒有奏獻古者用刑本期止辟  
今茲作法義切禁非蓋承弊之時非猛則姦兇難制  
及知勸之後在寬則典憲得宜相時而行庶臻中道  
今後應犯盜賊及和姦者並依晉天福元年已前條  
制施行應諸處犯罪人等除反逆罪外其餘罪並不  
得籍沒家產及骨肉一依格令處分天下諸侯皆有  
親較自可慎擇委任當必克勤參禪朝廷選差理或  
未當宜矯前失庶協通規其先于在京諸司差軍將

克諸州郡元從都押牙孔目官內知客等並可停廢  
仍勒却還舊處職役設官分職具列司存離局侵權  
誠爲紊撓今後諸司公事並須各歸局分不得越次  
施行朝廷之務顯有舊章職官具存安可廢墜如聞  
自前諸司公事多有壅滯今後並可速疾舉行國之  
大事在祀爲先苟爽吉蠲深爲瀆慢如聞自前祠祭  
宰饌頗虧肅敬今後委監察御史嚴加覺察必須豐  
潔庶達精誠稍或不恭國有常典近代帝王所在陵  
寢合禁樵採俾奉神靈唐莊宗晉高祖各置守陵十  
戶以近陵人戶克漢高祖皇帝陵置職員及守陵宮

人時月薦饗并守陵人戶等一切如故仍以晉漢之  
裔爲三王後委中書門下處分自古聖帝明王莫不  
好賢納諫是以立誹謗之木采芻蕘之言時之利病  
罔不知政之得失無不察達聰明目其在茲乎應內  
外交文武臣僚有見識灼然益於治道者許非時上章  
聞達山林草澤之間懷才抱器之士切在搜訪免致  
遺賢孝子順孫義夫節婦所宜旌表以勵時風於戲  
致理保邦非德教無以安萬國發號施令非誠信無  
以示四方其或言出行違朝行暮改是爲秕政何以  
子民更賴棟樑羽翼之臣左右前後之士共扶寡昧

同致雍熙思致器以永安都覆車之可戒納隍馭朽  
予豈忘諸釐革有所未盡者有司具啓請以聞  
二年五月親征兖州癸亥次曹州行宮在州禁繫罪  
犯人除死罪外並釋放是月兖州平壬午制曰在昔  
哲王承天育物莫不內修庶政外撫諸侯推誠以待  
人人皆自信虛已以馭下下無弗從是以車書大同  
革兵不試動植遂和平之性蒸黎絕愁嘆之聲朕以  
眇躬猥承大統側微自效嘗從軍旅之中億兆所推  
獲託王公之上涉道斯淺於德未章致其毒螫之覓  
爲我生靈之患逆賊慕容彥超輿臺賤類關葦微人

歷郡牧而至藩侯扇貪風而彰惡迹洎予臨馭無間  
綏懷而乃顛越不恭姦邪是恣北則結連戎虜南則  
臣事淮夷每與劉崇潛通人使剖割萬姓傷殘乃杼  
軸其空盜橫一州嚴酷如爐炭之上招呼亡命剽劫  
隣封繕甲治兵深溝高壘旣顯悖違之狀須興討伐  
之師朕昨暫御戎車來巡軍寨觀貔貅之賈勇憤虵  
豕以爲妖咸請先登不容假息士怒未洩逆壘俄平  
盜泉已涸其源流惡草盡除其滋蔓班師振旅六軍  
方樂于凱旋盪穢滌瑕一境宜覃於霈澤可赦兖州  
管内取五月二十七日見禁罪人及未發覺者大辟

以下並赦除元兇流毒同黨濟姦國有嘗刑皆合顯戮特示好生之道俛寬連坐之誅應曾與慕容彥超同惡之人逃避潛藏者並與釋放仰於所在自出陳首百日不首者獲罪如初應已伏誅逆黨人等於諸處有骨肉者先已指揮放罪招安尚慮本身抵法之後却有驚疑宜令所在州縣明行告諭並釋放不問兖州城內幕職及州縣官吏軍府將較今並放罪其衙前州使兩院職役人本城軍都並赦仍舊自慕容彥超違背已來鄉州山寨豪強人等接便爲非劫掠擄殺今因收復並與洗滌一切不問外諸軍將士等

勇於爲主奮不顧身所有沒於王事者各等第給孝絹仍以本人半分衣糧與本家一年有親子耆官中並與收錄安排自軍使都頭以上皆與贈官職賊據一城民殘四境或撤毀其牆屋或蹂躪其田疇槩于徵取供軍點集應役並宜矜卹漸蘇舒應兖州城內所有徵取今年屋稅及蠶食鹽鐵諸雜稅物並與除放城外官軍下寨處四面去州城五里內所毀今年夏稅苗子蠶食鹽鐵並諸雜沿徵錢物並與除放五里外十里內除放今年夏苗子三分中減放一分并兖州城內百姓被慕容彥超閉門已來無辜殺害

者宜令本州存恤其家其被殺官員宜令本州官具錄奏聞當行恩澤所有被毀折却舍屋極多及收城之時延火燒焚官中給賜材木重令蓋造攻取城池須資力役旣臨矢石或致喪亡致人歿身在朕深念諸州差別人夫內有遭矢石身死者宜令逐州縣分拆姓名聞奏官中各給絹三疋以省庫物充仍放下三年諸雜差遣勒本縣給與文帖其部領人夫州縣官等到城下施功者據勞役日月等第加減選萊蕪監所抽點到諸縣義軍已各指揮放散今後更不得管係名額其權克都將節級者亦不得此後於鄉村

內更有稱呼於戲夏爲長齋勞軍民以從役聖職教化用干戈而剪兇惟予不明增愧于是尚賴穹旻之祐漸期寰海之安告爾魯人咸體茲意

顯德元年正月丙子親祀圜丘禮畢御樓肆赦曰王者祀天地饗祖宗著於前經謂之大事嚴上者伸尊於下奉先者教孝於民簠簋豆邊陳其備物犧牲玉帛薦以至誠聿遵嚴配之文式展昭事之懇朕仰膺睠命下副樂推有兢兢業業之心無赫赫明明之德錫珪膺瑞莫繼禹功祝網爲仁但欽湯政接近朝喪亂之後當群黎凋弊之餘不敏不明何以爲治而寒

冊府元龜 赦宥十五 卷之九十一  
暑三往車書漸同征人少駐于邊防戰馬多閑于坵  
牧污萊加闢杼軸靡空從大化之未敷亦小康之遽  
致得非藝祖烈考垂其佑皇天后土被其恩鍾在眇  
躬躋此嘉會俾創業垂統傳之無疆治國安民引於  
有慶將恐將懼雖休勿休祗荷景靈是用大報恭以  
都邑所在宗廟爲先開創已來因仍其舊未伸移奉  
之禮重增怵惕之懷爰自雒陽卜遷浚下今四序資  
始三元履端陳水陸之毛載見清廟薦陶匏之質對  
越玄穹所謂禮行于郊而百神受職也凡爾衆庶同  
我虔恭申其肇禋旣謹就陽之禮施於純嘏宜覃及

物之恩改號紀年惟新行慶可大赦天下改廣順四  
年爲顯德元年自正月一日昧爽已前應犯罪人已  
結正未結正已發覺未發覺罪無輕重嘗赦所不原  
者咸赦除之其殺人者放罪移置他處貶降官與量  
移已量移者與復資已復資者與敘用諸配流人並  
任逐便如刺面配軍收管者不在此例流貶死者許  
歸葬草賊避法隱藏者所有巡簡人論以恩赦招呼  
令歸農養如願在軍亦聽其內外馬步都軍將士各  
等第優賞應見任內外文武職員諸軍將較致仕官  
節度防禦團練使刺史前任文武升朝官前內諸司

使副使前諸州行軍列使前指揮使諸道進奉專人  
前資官赴郊廟陪位者並與加恩內外命婦並與進  
封因夫子敘封者不得過夫子本品其諸寺監攝官  
如滿七周年以上應奉公事無遺闕文書灼然者並  
與同明經出身如不滿七周年者任逐便穩今後寺  
監不得以白身署攝如違本司官吏並當勘罪諸州  
府廣順二年已前逋欠稅沿徵錢並放其二年終已  
前主持省錢及主倉庫敗闕者據納家業外無抵當  
者並釋放自開創已來諸軍將較死王事者軍使都  
頭已上並與追贈已追贈者更追贈有親嫡子孫量

才敘用者諸軍將士年老病患不任征行情愿歸農  
者本軍具以名聞給憑繇放免應見任文武升朝官  
內諸司使副節度留後防禦團練副使禁軍都指揮  
使已上藩方馬步軍都指揮使等父母亡歿未經追  
贈者並與追贈已追贈者更追贈自廣順元年後來  
幽州淮南西川河東等界軍人百姓投降者累令安  
撫所在有無主荒閒田土一任請射住佃爲永業西  
川接界久不通商今後一任來往只須所屬官吏防  
閑恐夾帶姦細應祇奉郊廟職掌人員並與恩澤其  
行事官已勘無違碍者候銓司移省後各與除官合

來年集者候將來授任仍並加一階欠三選至五選者減一選欠選以上減兩選幕職並與減一年如欠月限不及一年者便與除官仍轉官資其諸色人駁放皆依格勅其間小小違碍可以情恕者並條奏以聞起今後升朝官兩任以上著錄十五周年者與賜緋著緋十五周年者與賜紫凡縣官歷任內曾經五度參選者雖未及六考與授朝散大夫階年七十以上令授優散官者並賜緋其非時特恩不拘此例梁宰受命奄有中原當歷數之有歸亦神器之所在潞王踐阼承紹唐基累年司牧於生靈諸夏奉承於正

朔莊宗克復以朱氏爲僞朝晉祖紇臨以清泰爲僞號所宜追正庶協通規今後不得名梁朝爲僞朝潞王爲僞主前代帝王陵廟及各臣墳墓無後者所在官吏簡較勿令樵採耕犁天下年高殘疾鰥寡孤獨所屬官吏務行存恤孝子順孫義夫節婦州縣以名聞者並與旌表門閭山林隱逸草澤才能所屬長吏搜訪具以名聞於戲安不忘危百王所以慎其德上之化下一人姑務正厥躬予苟有違衆皆無隱方今庶吏和勸貪者少而廉者多兆民從風令旣行而禁亦止司予刑者無忘哀矜又禮讓方興恩信兼布賦



役咸遵于法制鄉閭已絕於侵漁家遂求安國當思  
理從予政者無忘和平凡左輔右弼盡其心五侯九  
伯宣其力君唱臣和同寅協恭不致昇平未之有也  
凡百有位暨于群倫俱承福禧同體朕意節文有所  
未該者所司條奏以聞

世宗以顯德元年正月卽位三月辛巳制曰凡神聖  
之功乃開基以創業惟帝皇之德遂垂制而立文生  
成參天地之靈悠久鍾子孫之福寧禹湯而獨美豈  
堯舜以無倫先皇帝出震安時膺乾啓運改相仍喪  
亂之轍造勃興開泰之邦儉靜其身寬慈于物寒耕

熱耨之苦嘗念三農宵衣旰食之勤不忘萬務恩霽  
庶彙義結群心周室肇興安神器而方固軒臺遽行  
望仙駕以不廻肆予冲人獲紹丕構孤藐自視寡昧  
何知稟理命之丁寧副衆情之推奉中心憂塞罔有  
津涯易月之禮制尋終在天之感慕無已負荷斯重  
恭默以居宜從作解之文以洽當陽之澤可大赦天  
下應三月七日昧爽以前所犯罪人已結正未結正  
已發覺未發覺嘗赦所不原者咸赦除之諸貶降責  
授官等量與升陞敘用應配流徒役人及縱逢恩赦  
不在放還并嘗知所在者並放逐便諸處有草寇團

集仰所在州府及巡簡使臣曉諭恩赦招喚各令歸農兩京及諸道州府人戶所欠去年秋夏稅租及沿徵物帛並與除放其鄉村逃移人戶並仰招喚歸業內外見在文武職官致仕官及諸軍將較並與加恩其前任京官幕職州縣官至今授官日施行諸將軍較自開剗以來有沒于戰陣及身死疆場者並與追贈如有親嫡子孫未曾錄用者並與錄用文武外朝官及內諸司使副使禁軍都指揮使以上諸道行軍副使藩方馬步軍都指揮使父母在者並與恩澤忘歿者與封贈其妻未敘封者特與敘封應沿邊州府

接近西川河南契丹河東界處仰所在州府及巡簡使臣鈐轄兵士及邊上人戶不得侵擾外界及虜掠人畜務要靜守疆場勿令搔動其投來人戶仍仰倍加安撫大行皇帝山陵有期准遺命不得勞擾百姓者宜令所司奉承先旨無至隳違應緣山陵公事合使工人役夫並須先給錢物雇覓諸雜費用一切取官物供給不得差遣人戶科配州縣文武班列親近臣寮愛國誠堅致君心切苟或聞朕躬之過失覩時政之否臧無借敷陳以輔寡昧苦口良藥逆耳忠言裨益至多翹竚惟切今後內外臣寮或有所見及有

所禪益可其實封章表以聞或欲而對便仰閣門司  
畫時引見懷才抱器出衆超群或養素于衡門或屈  
迹于末位孤寒難進志業何伸咸用搜羅待以爵秩  
諸隱遁不仕及卑官下位中有文武幹畧灼見可稱  
者所在具名以聞化理之本孝弟爲先苟或虧違實  
亂名教其有士庶之內兇率之徒不順于父兄不恭  
于尊長狂悖難狀訓誨莫從親族容隱而不言里巷  
畏避而不告傷風敗俗莫甚于茲今後或有不孝不  
義之人違戾尊長喧悖毀辱及父母在異財別居畧  
不供侍如此之輩不計官宦軍人百姓之家宜令御

史臺及本軍本使所在州縣廂界彈舉覺察如或容  
縱不切簡舉罪有歸處其有孝子順孫義夫節婦宜  
所旌表以厚人倫恭惟先皇帝推誠損已焦思勞神  
念將士之忠勤知戰伐之辛苦餼糧祿賜無非經手  
經心土地官封不惜酌勲酌效生靈是念稼穡爲憂  
罷非理之差徭去無名之侵耗不貪遊宴盡去奢華  
減後宮冗食之人停諸司不急之務方嶽止其鮮之  
貢殿庭絕珠玉之珍獄訟無寃刑戮不濫凡關物務  
盡立規繩予小子纘紹丕基恭稟遺訓仰承法度不  
敢踰違更賴將相公卿左右前後共遵先旨同守成

規庶禪冲人不墜洪業赦書有所未該所司速具聞  
奏

四月庚午制曰昨者劉崇縱肆毒螫勾引蕃戎困我  
生民深入澤潞朕所以泣辭神御親總甲兵抑荼蓼  
之哀懷殄豺狼之兇黨誠賴玄穹垂祐將士輸忠大  
剪寇讎尋清源野覽賊寇經繇之地深切憫傷當城  
池圍閉之時良資捍禦適因駐蹕宜示特恩應潞州  
諸縣取今月二十七日巳前見禁罪人除死罪外並  
宜與釋放當州數縣昨經賊軍傷殘處人戶所徵今  
年夏稅斛躉錢帛三分與放一分內有村坊元不遭

賊寇殘傷者不在蠲放之限潞州昨經圍閉將較職  
員同力守禦兼以大駕駐蹕迎奉無關應在城將較  
官吏職員宜令本州具名銜以聞各加恩澤昨殺戮  
賊軍之處及四面山谷間屍首絕多宜令逐處官吏  
差人收斂埋瘞勿令暴露逐處墳墓曾被賊軍發掘  
者指揮掩閉河東及契丹敗散兵士其中有潛竄山  
谷間者並令招喚不得輒有傷害如是義軍百姓便  
可放歸本家若是軍人及諸色人並監送至駕前各  
與穩便安排遼沁二州新屬潞州久陷賊境深可憫  
傷委本道節度使倍加安撫所有劉崇煩苛事件並

與蠲放

二年十一月癸丑鳳翔節度王章上言收下鳳州乙卯詔曰朕承宗社之靈居億兆之上祇臨太寶于茲再周每念晉漢以來朝野多故疆宇日削生聚未堪嘗懷拯救之心冀答天人之意至於夙夜不敢荒寧求安邊拓境之謀思濟世息民之計乃眷秦鳳地接巴邛頃屬亂離因茲阻隔千里之地大朝之聲教不通十年之中百姓之艱苦難狀昨者興發師旅經畧封膳鼓鼙絕震於郊原地豕難逃於鋒刃僵尸遍野棄甲如山秦成階等州管内將較官吏軍人百姓等

喜寇孽之逋逃舉城壘而歸順飛章送款協力同謀父老相懽山河如故而僞署鳳州節度使王環等獨迷去就尚據城池朕念彼孤危繼令招諭惜一城之士庶開三面之網羅豈期拒轍之徒不體好生之德遂令攻擊立見盪平渠帥就擒秦隴無梗宜降惟新之澤庶隆及物之恩應秦鳳階等州管内自顯德二年十一月已前有罪犯者無問輕重一切釋放應馬步行營將士等各與恩澤其有歿於王事者自付兵馬使已上並與贈官仍賜賻贈物城下攻歿百姓爲矢石所害致死者本戶除二稅外放免三年差徭仍

賜本家孝服絹三疋其倍畧人夫州縣官並與加階減選秦城階等州歸明將士自長行以上等第支賜優給其官吏將較職員等並與加恩其中有西川人冒除恩澤賞賜外如願駐留者厚與請受如願歸去者並給盤纏用慰衆情免違物性應收捉到賊軍將較一切放罪並令押送赴關各與恩澤自何重建等歸投西川已來訪聞管内州縣連歲饑荒百姓軍人倍加勞役科歛頗併法令滋章既爲吾民宜革前弊今後除秋夏兩稅徵科外應僞蜀所立諸般科率名目及非理徭役一切停罷德音未該者宜令所司相

次指揮

三年五月乙卯帝至自淮南是日詔免在京見禁罪人六月壬申降德音曰王者經營四方式遏亂畧懷安逸而亡戰伐則雄圖莫震有雪霜而無雨露則歲功不成日者革輅親征靈旗問罪正陽之役吳師無匹馬之歸六合之征楚甲有齊山之積今長江以北半爲我疆實賴將相協謀貔貅宣力破彼勍敵成茲茂勲宜敷曠蕩之恩用慰輕揚之俗澤流霑於動植寵豈忘於忠勤聲教惟新甄賞斯在可特赦淮南道諸州管内見禁罪人取顯德三年六月十一日巳前

凡有違犯不問輕重並不窮問其江北諸州縣有未  
救復處宜令行營大將明申招諭儻能知幾變歸順  
朝廷其向來名位俱一切如故仍選明藩大郡厚加  
旌賞其軍都自長行以上並與優給其中有願歸江  
南者亦聽自便應隨駕淮南行營諸軍等或破敵成  
功或攻城効力或收降州縣或護衛乘輿咸積忠勤  
宜加酌獎各與等第優給從駕職官及諸色人員等  
從征在外奉事有勞各與加恩以獎勤幹諸州夫役  
自來有沒於矢石者其本戶放免三年差徭仍每人  
支賜贈孝絹三疋淮南道諸州縣先屬江南之時頗

有非理科徭無名配率今後一切停罷事有不利於  
民無益於時者宜令長史條奏以聞

四年正月己丑詔曰朕自守丕圖嘗勤庶政念萬方  
之至廣終日勞心恐一物之未蘇通宵不寐屬乾元  
資始春日載陽升紫殿以發德音秉鎮圭而朝群后  
順青帝發生之令體玄穹亭育之仁思與群生同慶  
嘉運及物之澤罔間於幽遐作解之恩宜均於雷雨  
應天下見禁罪人除犯大辟外一切釋放應諸色亡  
命之人官中自來追捕未獲者今並放罪諸道州府  
應欠顯德三年終已前秋夏稅物並與除放諸處敗

關場院人員自來累行徵督尚有逋欠實無抵當者宜令二司具欠分析數目聞奏別候指揮内外文武職官自前曾有犯罪停免黜削人等宜令中書門下樞密院具罪犯因繇聞奏別候進止應淮南界内百姓宜令行營將較告報諸軍不得俘虜傷害應有文學之吏武勇之人或幕府州縣官等臨事強明在任有所振舉爲衆稱譽者宜令所在長吏具名聞奏在朝文武臣僚於知識人中有如此者亦可公舉並當擢用待之厚祿於戲帝王之於億兆也教之化之納於仁壽當五兵未戢舜干暫舞於兩階洎中夏小康

湯網宜開於三面用示好生之德竚遵且格之言凡被炤臨體予朕意

三川庚戌以降下壽州制曰朕受天明命繼統中區寰瀛將保於大同征伐蓋非於獲已一昨以壽春未拔吳寇重來内外張皇烽火相接罔避艱勞之役須興再駕之師步騎長驅水陸齊進戈船砮柵一鼓盪平劉仁贍以衆意憂危援兵覆沒遣子上表瀝血求哀矜彼含生許其納款兵革之後黎庶未安念狐壘之初開解疎羅而示德宜覃在宥之澤俾安向化之心可赦壽州管内見禁罪人自今月二十一日昧爽



已前凡有過犯無問輕重並從釋放應歸順官吏將  
較職員並與等第加恩壽州管界去城五十里內與  
放今年及明年秋夏租稅自來百姓有曾受江南文  
字聚集山林者押逐處長吏使臣招喚歸家並不問  
罪如曾有傷害者今後不得更有相酬及經官論訴  
兼自用兵已來被擄劫骨肉者不計遠近並許本家  
識認官中給物收贖所在不得藏占曾經陣敵處所  
暴露骸骨仰差人收拾埋瘞自前後政令有不便於  
民者委本州條列聞奏當行釐革

恭帝以顯德六年六月甲午即位七月丙寅制赦天

下

冊府元龜

帝王部

册序  
五  
卷之九



